

清

史

稿

清史稿

列傳一百十四

劉藻

楊應琚
字重英

明瑞

劉藻字素存山東荷澤人初名玉麟以舉人授觀城教諭乾隆元年薦舉博學鴻詞試一等授檢討更名累遷左僉都御史圓明園工興疏言園工不過少加補葺視前代飾臺榭之觀者度越何啻萬萬臣愚以爲奢靡之漸不可稍開乞皇上慎始慮終爲天地惜物力爲國家培元氣來歲諸工酌量停減上嘉納遷通政使六年擢內閣學士督江蘇學政尋以高郵諸生求賑而閩左授宗人府府丞藻居揚州候代有吳之黼者以文求教藻行饋精魚受之中途發視得白金四百藻畀兩淮運使朱紱暉還之黼上聞諭曰如此方不愧四知旋乞養歸孝賢皇后及長皇子定安親王喪藻詣闕入見會大學士張廷玉乞歸失上指因獎藻謂其知君臣休戚相關大義以媿廷玉加藻內閣學士銜賜人蔭二斤命歸養母母喪終二十一年授陝西布政使二十二年擢雲南巡撫加太子少

保兼領貴州巡撫二十九年例行大計巡撫圖爾炳阿未至藻疏請先期舉行上嘉之旋授雲貴總督三十年疏言年來木梳野匪與緬甸所屬木邦構釁又與耿馬土司毗連自木邦至滾弄江應設卡防守請於各土司就近派撥詔如所請三十一年移湖廣總督未行尋奏副將趙宏榜等赴孟連耿馬勦逐莽匪鎮臣烏爾登額赴滾弄江口臣於普洱思茅各隘調度又奏言由小猛崙進攻九龍江橄欖壩諸寨多斬獲惟叅將何瓊詔遊擊明浩派赴整控江防禦冒昧渡江遇賊敗沒尋奏瓊詔等未死請治貪功輕進之罪上以瓊詔明浩等遇賊敗逃又復妄言敗沒此法所難宥藻反稱冒昧貪功輕進何憤憤乃爾詔言藻本書生軍行機宜非其所習朕不責以所不能至調度賞罰並可力爲籌辦乃舛謬若此豈堪復勝總督之任因左授湖北巡撫命楊應琚代往復諭應琚未至藻當寔力經理若自以爲五日京兆致誤事機必重治其罪部議奪職留雲南効力藻聞上怒惶迫自殺巡撫常鈞疏報上令應琚至普洱爲求醫治療傷平傳旨逮問常鈞旋奏藻死上復詔責其張皇畏葸旅櫬歸葬不得聽其家立

碑書歷官事實三十二年巡撫鄂寧奏言緬甸本莽瑞體之後乾隆十八年木梳頭目變籍牙逐其酋莽打喇而自立夷人遂呼緬甸爲木梳或呼緬或呼莽非二種也

楊應琚字佩之漢軍正白旗人廣東巡撫文乾子應琚起家任子乾隆初自員外郎出爲河東道調西寧道巡撫黃廷桂薦其才高宗曰若能進於誠而擴充之正未可量也累遷至兩廣總督先後疏請練水師籌軍食修灘水陡河堤壩貯柳桂慶梧餘鹽皆如所請行進羅貢使毆傷通事其國王鞠實擬罰銀遣使牒禮部應琚曰屬國陪臣無上交好語諭遣之稱旨二十二年移閩浙總督二十三年加太子太保二十四年移陝甘總督疏言伊犁底定宜先屯田留兵五千掣特諾果爾長吉羅克倫復以陝甘非一督能治請更西安總督爲川陝總督四川總督爲巡撫甘肅巡撫爲總督上遂命應琚督甘肅陝西提鎮受節制進太子太師嘗募巴爾楚克回戶治多蘭溝渠墾喀喇沙爾以西各臺又增置兵備道總兵分駐阿克蘇葉爾羌二城遂爲重鎮應琚奏辦屯墾遣兵購畜部

署紛煩至是疏自言其非請因利乘便規久遠帝嘉納下其疏示中外二十九年移駐肅州拜東閣大學士三十一年緬甸大入邊滇事棘緬酋莽達拉自爲木梳長所篡擊敗貴家木邦貴酋宮裏雁奔孟連時應琚子重穀爲永昌知府誘殺之本酋亦走緬益橫入犯思茅上移應琚雲貴總督視師應琚至楚雄緬人漸退師乘間收復應琚往孟良整實正經界集流亡釐戶口定賦稅而令召丙叭先俸分據之請賞給三品指揮使上以爲能賜珍物官其孫茂齡藍翎侍衛又使人誘致孟密孟養蠻暮令獻地實則地懸緬境內附特空言諸將希應琚指爭謂緬勢孤易攻取應琚初猶弗聽曰吾官至一品年踰七十復何所求而以貪功開邊衅乎副將趙宏榜怨惠之遂下道鎮府州合議亦謂寇勢大邊衅不可開總兵烏爾登額阻尤力應琚滋不懌永昌知府陳大呂懼更初議應琚迺往永昌受降並爲文檄緬修言水陸軍五十萬陳境上不降卽進討緬遂大發兵溯金沙江而上其時宏榜頓新街卻走應琚聞警卽遶疾上命楊廷璋往代遣侍衛傅靈安攜御醫往診並諭其子江蘇按察使重英寶慶知府重穀

省視比廷璋至而疾已愈乃令諸軍進擊總兵朱崙出鐵壁關攻楞木不克寇勢益張提督李時升告急應琚不報緬陽議款遂以楞木大捷入告而緬已漸入戶撒時總兵劉德成擁兵于崖飲酒高會時升屢趣罔應應琚遣緬甯通判富森持令箭督戰德成始抵番達緬懼擊其後潛引去應琚仍以捷聞緬甸復入猛卯參將哈國興等引獵砲械多遺失應琚又報捷並傳令朱崙兼勦撫陰示以和議事緬果累乞和踰歲奏言緬甸曾弟卜坑率斬渺遮乞款附懇予蠻暮新街互市上察其偽數詞責嗣木邦告警國興軍抵蠻暮寇欲退應琚又以復新街奏上視所進地圖疑寇既屢敗何以尙據內地土司境降旨駁詰會福靈安先被命廉軍事具言宏榜諸人失守狀應琚亦劾德成等遲留不進於是俱逮問而以楊甯爲提督且以應琚不勝任召明瑞代統其軍明瑞至首發其欺罔罪謂誤木緬別爲一事尤妄誕鄂甯亦糾其掩敗爲勝應琚恐迺上言大舉征緬調湖廣川滇軍五萬五路並進請敕暹羅夾攻朝諭皆斥之未幾詔逮問賜死重穀亦坐管殺人棄市重英初至雲南隱以監軍自居嗣爲鄂寧所劾

命以知府從軍明年軍士患飢緬味詐婦和參贊珠魯訥遣重英往報被執上以重英且降緬下其子長齡獄已緬歸俘卒寶貝葉書附重英書乞罷兵拒弗納四十一年緬出都司蘇爾相議和仍弗許五十三年緬聞暹羅受封乃款關求貢並還重英重英陷緬後獨居佛寺踰二十年未改中國衣冠上大悅進道員釋長齡出獄比以蘇武之節御製蘇楊論旌之俄病卒蘇爾相甘肅靈州人自行伍從征緬甸金川有勞累遷雲南奇兵營都司三十五年雲貴總督彰寶以緬甸表貢久不至遣爾相齎檄往諭被留迫使上書阿桂申表貢之議上謂爾相且降緬命甘肅巡吏執爾相妻孥致京師子一女二死於獄妻死於道四十一年緬始送爾相還上命阿桂傳諭令其詣京師引見授游擊賜詩亦比以蘇武累遷騰越鎮總兵兼署雲南提督卒

明瑞字筠亭富察氏滿洲鑲黃旗人承恩公富文子自官學生襲爵乾隆二十一年師征阿睦爾撒納明瑞以副都統銜授領隊大臣有功擢戶部侍郎授參贊大臣於公爵加毅勇字號承恩毅勇公二十四年師征霍集占復有功賜雙

眼花翎加雲騎尉世職師還圖形紫光閣擢正白旗漢軍都統二十七年出爲伊犁將軍進加騎都尉世職三十年二月烏什回爲亂駐烏什副都統素誠自戕亂回推小伯克賴黑木圖拉爲渠拒守明瑞遣副都統觀音保往討而帥師繼其後烏什回二千餘出禦明瑞與觀音保力戰破之奪砲台七賊入城師合圍明瑞疏陳素誠狂縱激變及參贊納世通唐回民阻援師副都統弁塔哈掩敗妄奏諸狀上令尙書阿桂至軍按誅納世通弁塔哈賊夜襲我軍我軍詢知之預爲備射賴黑木圖拉殪賊擁其父額色木圖拉爲渠明瑞以兵六百餘夜携雲梯薄其城不克則毀其堞且斷汲道賊待阿富汗援不至乃縛獻額色木圖拉等四十二人降明瑞悉斬之其脅從及婦稚萬餘送伊犁烏什平上以明瑞得渠魁未詳鞠爲亂狀亂回至圍急始縛獻首惡不可輕宥所措置皆不當與阿桂同下部議奪職命留任旋條上善後事如所請是時緬甸爲亂犯邊總督劉藻戰屢敗自殺大學士楊應琚代爲總督師久無功賜死三十二年二月命明瑞以雲貴總督兼兵部尙書經略軍務明瑞議大軍出永昌騰越攻宛頂

木邦爲正兵遣參贊額爾登額出北路自孟密攻老官屯會於阿瓦十一月至宛頂進攻木邦 遁留參贊珠魯納按察使楊重英守之率兵萬餘渡錫箔江攻蠻結寇二萬立十六寨寨外浚溝溝外又環以木柵列象陣爲伏兵明瑞統兵居中領隊大臣札拉豐阿李全據東山梁觀音保長青據西山梁賊突陳西出觀音保長青力戰明瑞督中軍進殺賊二百餘賊退保柵明瑞令分兵爲十二隊身先陷陣目傷猶指揮不少挫賊陣中羣象反奔我兵毀柵進無不一當百有貴州兵王述者舞藤牌躍入陣衆從之縱橫擊殺賊二十餘俘三十有四賊遁走捷聞上大悅封一等誠嘉毅勇公賜黃帶寶石頂四團龍補服原襲承恩公畀其弟奎林札拉豐阿觀音保勸明瑞乘勝罷兵明瑞不可師復進十二月次革龍地逼天生橋渡口賊踞山巔立柵明瑞令別軍出大道若將奪渡口而督軍從間道繞至天生橋上游乘霧徑渡進據山梁賊驚潰俘賊二千餘復進至象孔糧垂罄欲退慮額爾登額師已入聞猛籠土司糧富且地近孟密冀通北路軍消息乃移軍猛籠賊尾我軍後至章子壩我軍且戰且行明瑞及觀

音保等殿日行不三十里至猛籠已歲除土司避匿發窰粟二萬餘石駐三日復引軍趨猛密人持數升粟焚其餘積賊踴我軍行至夕駐營初相距十餘里賊詢我軍飢疲經蠻化我軍屯山巔賊卽營山半明瑞謂諸將曰賊輕我甚不一死戰無噍類矣賊識我軍號明日我軍傳號若將起行則盡出營伏簪待明旦賊聞聲蟻附上山我軍突出發槍砲賊反走乘之斬四千有奇自此每夜遙屯二十里外明瑞令休兵六日賊柵於要道我軍攻之不能拔得波竜人引自桂家銀廠舊址出上聞明瑞深入命全師速出詔未達三十三年正月賊攻木邦副都統珠魯訥師潰自戕執重英以去額爾登額出猛密阻於老官屯月餘引還繞從小隴川緩行巡撫鄂寧檄援不應於是明瑞軍援絕而賊自木邦老官屯兩道並集二月至小猛育賊屬聚五萬餘我軍食罄殺馬贏以食火藥亦竭槍礮不能發明瑞令諸將達興阿本進忠分隊潰圍出而自爲殿血戰萬寇中札拉豐阿親音保皆死明瑞負創行二十餘里手截辮髮授其僕歸報而經於樹下其僕以木葉掩尸去事聞上震悼賜祭葬諡果烈建旌勇祠京師諸將

死事者札拉豐阿觀音保李全王王廷命並祀珠魯訥以自戕不與額爾登額及提督譚五格坐失機陷帥逮詣京師上廷鞫用大逆律磔額爾登額囚其父及女並族屬成新疆譚五格亦棄市而以其明日祭明瑞及札拉豐阿觀音保上親臨奠明瑞無子以奎林子惠倫爲嗣襲爵自侍衛累遷奉宸院卿嘉慶初勦教匪湖北自荊門宜城遂賊入南漳山中賜玉搬指荷包復逐賊至長坪射賊渠殪餘賊兢集中鎗死賜白金三千

論曰藻起詞科以廉被主知陟歷中外應琚持節臨邊著聲績要皆不習軍旅措注失條理事敗身殉明瑞深入度敵不可勝遺諸軍徐出而躬自血戰誓死不反顧功雖不成忠義凜烈足以讐敵矣

清史稿

列傳一百十五

常青

藍元枚

蔡肇龍

廣東南海人

丁朝雄

鄂輝

舒亮

常青，佟佳氏，滿洲正藍旗人。父安國，官至江西巡撫。常青自寧郡王府長史累遷察哈爾都統、杭州、福州將軍。五十一年，署閩浙總督。諸羅縣民楊光勳與其弟爭家業，糾衆立會，縣吏捕治不服。常青令按察使李永祺往按，上以臺澎在海外，不可輕縱，諭勿使蔓延。疏脫尋實，授閩浙總督。十二月，林爽文亂起，陷彰化，知縣俞峻死之。常青檄水師提督黃仕簡自鹿耳門進，副將丁朝雄從海壇鎮總兵郝壯猷自淡水進，都司馬元勳屯鹿仔港，分道部署。復如泉州會陸路提督任承恩調度，令金門鎮總兵羅英笈詣廈門彈壓。尋復令承恩自鹿耳門繼進。五十二年，奏賊陷諸羅、臺灣，鎮總兵柴大紀堵剿賊勢稍沮。爽文漳州人，其徒率漳籍移會兩廣，督臣防範上責其張皇。授李侍堯閩浙總督而移常青。

湖廣旣又命常青渡臺視師四月至臺灣勅仕簡承恩遷延觀望擁兵自衛壯猷守鳳山賊至棄城走諭逮承恩罷仕簡候命而誅壯猷遂授常青爲將軍賊攻府城常青督諸軍禦戰有所俘馘賊攻桶盤棧令遊擊蔡攀龍等分駐力禦奏入上以常青年逾七十能如此勇往督戰手詔嘉獎授其子刑部筆帖式喜明三等侍衛馳驛往省並賜御用搬指旋奏爽文還大里杙舊巢其徒莊大田等萬餘人分擾南路擬先南勦大田乃北取爽文上懸之下部優叙旋奏勦賊南潭殲賊六百餘爽文之徒莊錫舍出降擒僞軍師番婦金娘請檻軍送京師上命授錫舍守備又奏進勦鳳山出城未十里賊三面並進官兵奮勇擊退賊勢蔓延請厚集兵力遣大臣督戰上命陝甘總督福康安往視師旋奏賊犯府城爲丁朝雄擊退官軍攻莊大田於南潭殺賊二百餘大營距府城未遠勢相犄角無後顧之虞得旨嘉獎賜雙眼孔雀翎旋迭奏鹽水港笨港均爲賊據糧道旣斷諸羅勢甚危令總兵魏大斌赴援戰賊失利又令遊擊田藍玉援大斌上以兵分力薄飭常青調度失當又諭常青駐軍桶盤棧距南潭不過五里不

將賊目莊大田先行剿除乃結膏自守肘腋之間任其逼處八月命福康安爲將軍督諸將海蘭察普爾普等大山師討爽文諡常青謂非責其師無功特以年已七十軍旅非所素習福康安未至仍當相機進剿旋奏賊自南潭來攻侍衛烏什哈達等擊敗之因雨後路滑收兵又進攻南潭焚草萊數百間以天晚山徑偏仄不便深入衆謂賊所居草屋也上以其屢稱遇雨路仄收兵傳旨嚴飭上又聞賊嗣知軍中暑濕多病常青機事不密又不督兵深入屢詰責旋奏總兵梁朝桂勦賊多斬獲提督柴大紀報諸羅圍急令副將蔡攀龍赴援上諭令親授大紀待福康安至合軍進攻旋奏同江寧將軍永慶等在竹篙厝等處殲賊甚衆山猪毛社義民尤捷獲礮一生擒賊目張招又奏總兵普吉保克月眉莊距諸羅五里令與大紀并力固守又令諸生劉宗榮等給番社土目札諭防賊竄匿屢得旨嘉許福康安渡臺灣上授常青福州將軍留辦善後令從將軍戰戴單眼孔雀翎福康安劾大紀貪劣狀上責常青徇隱奪職交福康安嚴鞫福康安旋以常青自承徇隱請交部治罪上特有之召詣京師署鎮紅旗

蒙古都統五十四年授禮部尙書鑲藍旗漢軍都統五十八年卒諡恭簡子明喜官至徐州鎮總兵常青初視師福州將軍恒瑞水陸二提督任承恩黃仕簡皆在行戰無功承恩仕簡以誤軍機坐斬臺灣平敕出獄仕簡至狼山鎮總兵承恩亦至副將恒瑞自有傳

藍元枚字簡候福建漳浦人提督廷珍孫父曰寵官福建銅山營水師參將元枚襲三等輕車都尉世職乾隆三十一年命發廣東以外海水師參將用補海門營參將累遷總兵歷臺灣金門蘇松三鎮四十九年授江南提督五十二年正月臺灣民林爽文爲亂命元枚馳驛往泉州署福建陸路提督駐蚶江策應至福州奏言師渡臺灣亂民潰散慮入內山與生番勾結上諭令速捕治俾盡根株水師提督黃仕簡率兵討爽文坐逗留奪官以命元枚並賜孔雀翎授參贊趣率兵渡鹿仔港會總督常青進討六月元枚率兵次鹿仔港與總兵普吉保師會卽夜師分道自柴坑仔大武壠入殺賊甚衆上嘉之賜雙眼孔雀翎元枚所將止浙江兵二千奏請益師上命總兵李侍堯發福建兵二千廣東兵三

千益元枚時總兵柴大紀堅守諸羅元枚使告大紀期會兵攻斗六門戰阿棟社戰埤頭莊大肚溪屢殺賊復進攻西螺焚條圳塘中蒲厝諸地賊莊元枚族人啓能等七十九人自賊中出使爲導元枚奏聞並言如察出啓能等已從賊當立誅上嘉其公當賜緋絲蟒袍上佩荷包並諭啓能等既來歸前此已否從賊不須追詰諸羅被圍已兩月大紀屢就告急上屢趣元枚赴援諭廷珍平朱一貴七日而事定元枚當效法其祖母負委任七月元枚病作八月賊自竹子脚大肚溪柴坑仔三道來攻元枚力疾出戰病益劇越十日卒於軍贈太子太保發白金千兩治喪賜祭葬諡襄毅元枚諡同廷珍時稱小襄毅以別之

蔡攀龍福建同安人自行伍屢遷至福建澎湖右營遊擊乾隆五十一年林爽文爲亂巡撫徐嗣曾檄詣軍五十二年賊破鳳山總兵柴大紀令督兵捕治賊攻臺灣府城攀龍出戰屢破賊賊屯西園莊攀龍率諸將瑚圖里丁朝雄分道攻之殺賊三百賊復攻府城總督常青令攀龍率諸將保全謀黃象新等禦戰賊乘東南二門攀龍等力戰殺賊數百奪九節轡論功擢北路協副將賜孔雀

餉賊復至攀龍督戰復殺賊三百餘予強勝巴圖魯名號七月常侍令攀龍援柴大紀諸羅上命授海壇鎮總兵攀龍師至鹽水港分八隊以進兩大至賊乘兩合圍諸將貴林楊起麟杭富皆戰死會大紀以師來迎攀龍及全謀兵不及千人偕運餽民三千人入諸羅復出城殺賊總督李侍堯聞攀龍兵達諸羅未知貴林等戰死狀謂諸羅圍已解入告上擢攀龍陸路提督參贊軍務貴林起麟全謀並遷官俄侍堯復疏陳上命卹戰死諸將福康安既解嘉義圍疏劾大紀因言攀龍軍嘉義西門外並無出城殺賊事自請奪職擬請令還海壇本任上謂攀龍屢戰有功其過尙可寬五十三年逮大紀治罪移攀龍水師提督師攻大武壠令攀龍駐灣裏溪夾攻既擒其弟勇及賊渠莊大田猶窺伺府城攻灣裏溪圍斷府城道福康安遣攀龍分道進攻頗有斬獲事平圖形紫光閣列前二十功臣上自爲贊許爲臺灣戰將中巨擘師還諸將言攀龍平庸福康安亦言未能勝任左遷江南狼山鎮總兵嘉慶三年卒梁朝桂甘肅中衛人乾隆三十七年以中衛營外委從征金川先後攻克路頂宗布朗郭宗及功噶爾拉

了口昔嶺阿喀木雅三十九年克溯普進攻喇穆嶺山梁奪日了口四十年
剿勒吉爾博塞先登被創四月攻木思工噶克山潛師入盡克其城調據康薩
爾玉了口山十月克西里山錄功賜孔雀翎累遷陝西潼關協副將金川平列
五十功臣圖形紫光閣累遷甘肅肅州鎮總兵坐事罷復起自福建福寧鎮移
廣東高廉鎮五十二年臺灣林爽文爲亂莊大田應之別爲南路賊朝桂率兵
敗大田於蔴松斬馘二百餘賊衆數千犯大營擊却之斃賊三百將軍常清慮
南路賊北擾諸羅檄朝桂堵禦連敗之南潭中州十三里莊殲數百人九月常
清移師北路剿爽文以朝桂守臺灣府城賊來犯擊走之其冬援參贊恒瑞於
鹽水港燬賊寮賜號奮勇巴圖魯復同恒瑞自鹿仔草進勦鎮平莊受創力戰
敗賊時提督柴大紀被圍諸羅急朝桂欲馳援恒瑞不聽大紀以聞帝令將軍
福康安察奏會福康安抵鹿仔港檄朝桂仍駐守鹽水港及鹿仔草五十三年
春就擢福建陸路提督檄勦麻豆莊大武隴屯賊通郡城要道大田時據大武
隴拒守朝桂自茅港尾繞至阿里港迎截復赴打狗竹仔各港口截其走路大

田力不支自牛莊竄極南之耶嶠負山阻海福康安自鳳港進至柴城分六隊直逼海岸與朝桂環攻之大田及他賊目四十餘悉就擒臺灣平再圖形紫光閣金門巡洋艦被劫以朝桂不能戢盜移廣西再移湖廣卒普吉保札庫塔氏滿洲正黃旗人乾隆三十年以藍翎侍衛從軍征烏什有功補三等侍衛三十七年從參贊大臣舒常攻日旁有功三十九年從副將軍豐昇額攻凱立葉山進抵迪噶拉穆札山賊分三隊普吉保偕侍衛瑪爾占等夾攻斃賊無算賜衝捷巴圖魯名號四十年攻噶爾丹寺諸地連破木城石碉上獎普吉保勇往累擢福建汀州鎮總兵林爽文爲亂總督常青檄普吉保會勦五十二年率水師渡臺灣迭破賊鹿仔港八卦山上嘉其奮勉爽文見師至退守斗六門大里杙普吉保以師進爽文攻諸羅赴援抵笨港率遊擊海亮等殲賊數百燬賊莊七得旨嘉獎賜玉搬指荷包蟒袍笨港潰賊糾衆截我兵普吉保擊斬甚衆嗣以駐兵元長莊月眉莊不進旨嚴飭尋攻大埔林收復斗六門爽文竄內山普吉保從諸將徒步陟山搜捕五十三年以兵扼科仔坑口合圍俘爽文南路莊大

田亦就擒臺灣平圖形紫光閣普吉保初克鹿仔港以福康安疏薦授臺灣總兵明年上念臺灣定初慮普吉保不能勝命解任尋授廣西左江鎮坐責把總黎振乾投水死戍伊犁卒

丁朝雄字伯宜江蘇通州人自行伍累擢福建臺灣水師副將乾隆五十一年以任滿赴部引見至省城聞林爽文亂起朝雄策東港與鳳山犄角爽文所必爭白總督常青請兵屯東港斷其糧道常青不能用遣朝雄還臺灣佐海壇鎮總兵郝壯猷討爽文五十二年春壯猷偕朝雄率兵二千餘擊賊馘三百俘二十五日將暮賊復來攻朝雄復殺賊百餘賊始去攻鳳山朝雄乘東門首諸軍入鳳山遂復黃仕簡枋朝雄守安平海口賊攻府城朝雄偕知府楊廷樺督兵民力禦賊攻桶盤棧朝雄爲前鋒出戰臺灣道永福同知楊廷理率兵民繼復殺賊百餘賊敗走冬朝雄偕遊擊倪寶率兵千二百義民二千餘攻東港東港賊數萬其渠吳豹以海岸淺度舟不能至不爲備朝雄遣謀以水注賊礮乘雨至水漲遣兵民分道登岸殺賊俘豹以兵寡不能克報常青請益兵常青令駐

港口護餉道既令攻竹仔港燬賊舟五十三年春復攻東港仍遣謀以水注賊
礮督兵攻渡口賊驚竄逐三十餘里乃倚山而軍賊夜來犯朝雄戒勿動及曉
賊倦掩擊大破之爽文遣其徒來援朝雄築壘困之賊潰圍出設伏斷其歸路
而自將追之大破賊遂復東港福康安上其功授海壇鎮總兵既福康安劾柴
大紀受陋規言朝雄爲安平協副將時亦有此當奪職戍軍臺上以朝雄攻東
港戰有功命留任林麇舵林明灼者海盜渠也五十四年朝雄巡洋至汜澳破
盜巢得麇舵等而明港拒殺參將張殿魁上責總督伍拉納伍拉納以屬朝雄
督舟師出海遇諸大麥洋俟其近發大礮斃數酋明港窮蹙躍入海官軍鈎致
俘以歸五十五年追詢朝雄在臺灣失察天地會邪教當奪職上諸伍拉納朝
雄在官狀伍拉納言朝雄督水師捕盜有勞命還任五十八年攝水師提督五
十九年入覲至清江浦病篤乞罷歸卒於上海舟中

鄂薩碧魯氏滿洲正白旗人自前鋒分發四川試用守備七遷建昌鎮總兵從
大學士阿桂定蘭州回亂予法什尙阿巴圖魯名號再遷成都將軍五十二年

署四川總督將軍福康安討臺灣亂民林爽文上命鄂輝率四川屯練降番濟師尋授參贊從渡海援嘉義鄂輝屯東莊溪橋攻克牛稠山竹柵嘉義圍解逐賊至大排竹殲之師攻斗六門賊自山下撲鄂輝督兵衝截賊奔逸攻克大埔林大埔尾二莊賊潰爽文自所居大里杙奔內山番界鄂輝逐之至集埔五十二年春調知爽文所置地曰東勢角福康安督鄂輝及舒亮追捕自歸仔頭至麻著社分軍鄂輝自撲仔離東山路進舒亮直取東勢角是役遂俘爽文亂乃定上命臺灣嘉義立諸將帥生祠鄂輝與焉師還圖形紫光閣賜雙眼孔雀翎雲騎尉世職鄂輝朝熱河行在廓爾喀侵西藏據濟隴聶拉木諸地上促鄂輝還四川與提督成德帥師赴援又命侍郎巴忠往按巴忠先營爲駐藏大臣習藏事示意噶布倫令賂廓爾喀返侵地鄂輝等遂與議和疏陳善後事尋授四川總督五十六年廓爾喀渝盟復侵濟隴聶拉木諸地上命將軍福康安督師討廓爾喀責鄂輝誤用巴忠議致復生事奪官予副都統銜駐藏聽福康安指揮福康安令督餉工部尙書和琳劾鄂輝得廓爾喀貢表不以上聞命奪副都

統銜速赴前藏荷校示罰五十八年命還京師授拜唐阿加員外郎銜遷熱河總管嘉慶初命以待衛詣荊州從勦教匪戰有功以都統銜加太子少保授湖南提督屢破賊與額勒登保等攻克石隆山斬賊渠石柳鄧封三等男二年擢雲貴總督三年卒謚恪靖祀賢良祠四年追論在湖北軍中受餽白金四千罷祀

舒亮蘇佳氏滿洲正白旗人自前鋒累遷參領師征金川舒亮從副都統齊里克齊率健銳營爲裨將攻穆谷舒亮伏山下待賊殺賊甚衆攻卡角賊匿山溝舒亮於密箐中望見火光以火器就擊之賊驚潰以功累遷鑲黃旗滿洲副都統從克噶拉依賜穆騰額巴圖魯名號師還圖形紫光閣四十六年大學士阿桂討撒拉爾亂回蘇四十三舒亮從初至破賊華林山賊掘濠設卡以自固阿桂令海蘭察自山西攻賊卡舒亮自南山進當賊鋒賊競山射舒亮傷左股舒亮拔箭裹創復戰奪賊卡四殺賊百餘又與海蘭察調賊不備以土囊填濠度軍殲守濠賊復奪十餘卡蘇四十三既誅復勦華林寺餘匪事平還京師林爽

文之亂福康安出視師舒亮以正黃旗護軍統領爲領隊大臣至臺灣福康安軍道笨港救嘉義令舒亮出別道分賊勢賊方據北大肚山拒我舒亮迎擊敗之連破南大肚王田瀨酒半山坑子諸莊遂克烏口莊會福康安軍夾擊解嘉義圍五十三年爽文竄匿東勢角福康安督舒亮等追逮令舒亮直取東勢角山徑峻險將卒皆步上殺賊二千餘爽文復走老衢崎舒亮督諸軍急進獲之亂遂定上以臺灣遠在海外主客民雜處風俗素悍命於府城及嘉義立諸將帥生祠示威德祠成命並及在事疆吏首福康安次海蘭察李侍堯普爾普鄂輝徐嗣曾而以舒亮殿焉尋授鑲紅旗蒙古都統師還命監爽文及其徒賴大等生致京師賴大道病舒亮令誅之不稱上意命仍爲護軍統領叙功子雲騎尉世職再圖形紫光閣出爲荊州黑龍江將軍在黑龍江坐私市貂皮奪官削世職川陝楚教匪起命以三等侍衛從軍嘉慶元年戰襄陽再戰劉家集屢俘斬賊渠攻當陽先登額中鎗奮進殺賊千餘獲其酋遂克當陽賜孔雀翎授鑲藍旗漢軍副都統自鍾祥分竄唐鄧設伏呂堰驛西竄賊殲焉乃合兵逐東竄

賊戰草店復中鎗喪銀絲合荷包旋以縱賊渡滾河奪孔雀翎巴圖魯二年坐賊渡漢江降三品頂戴三年復以總督勒保効勦賊不力奪官以兵丁留軍尋卒

論曰林爽文亂起常青及福州將軍恒瑞並水陸二提督躬率師東渡徘徊坐誤高宗爵柴大紀誅郝壯猷欲以激勵諸將繼以元枚代功未竟而卒終煩禁旅始克底定承平久水陸諸軍不足用不得獨爲大紀罪也鄂輝舒亮從福康安出師與攀龍朝雄皆有戰績然大紀力保危城當時聲譽遠出諸將上功名之際有幸有不幸固如是夫

清史稿

列傳一百十六

宋元俊

字仲修 鎮江人

董天弼

柴大紀

宋元俊字句芳江南懷遠人以武進士授四川成都營守備遷懷遠營都司乾隆二十年孔撒麻書兩土司構殺金川絳斯甲布兩土司乘隙爲亂元俊爲撫定集孔撒麻書金川絳斯甲布革布什咱絳沃白立章谷瞻對諸土司斷曲直使頂經立誓累遷阜和營游擊二十九年金川土司耶卡侵丹壩絳斯甲布兩土司諸土司請兵署總督阿桂提督岳鍾琪奏令元俊偕署副將長清諭各土司合兵進剿移涼臘營參將坐事左遷三十五年小金川土司澤旺之子僧格桑掠鄂克什阿桂檄元俊宣諭僧格桑還侵地及所掠番民復補阜和營游擊三十六年革布什咱頭人結郎卡子索諾木據革布什咱官寨戕土司策楞多布丹總督阿爾泰復令元俊往宣諭小金川圍鄂克什達木巴宗侵明正土司據納頂寨元俊與參將薛琮都司李天佑率兵討之收納頂寨進攻索布大寨

琮率兵自山梁潛度元俊與天佑渡河夾擊獲石卡十八屢戰皆捷明正土司
礪寨七百餘盡復師入小金川境取噶中拉莫如納扎功拉等地進克納咱阿
爾泰及侍郎桂林以聞擢松潘鎮總兵師攻甲木賊據喇嘛寺爲固元俊及守
備陳定國攻破之盡收所屬城卡礪寨據墨爾多山梁師復進天佑定國攻西
山梁元俊同侍衛六十一參將巴克坦布等自喇嘛寺繞攻郭松參領普甯自
西山麓沿河攻甲木侍衛哈青阿及琮自東山麓攻卡了師行以夜半戰自卯
至己卡了郭松甲木皆克賜元俊孔雀翎三十年師攻革命什咱元俊請於桂
林分兵爲五道一自郭宗濟野宗攻木巴拉博租一自章谷渡河夾攻俾賊前
後受敵兩軍旣合先據默資溝截金川來路進取吉地官寨一自巴旺之高石
嘉舉諸山分道攻薩瑪多監藏布覺取吉地一自茂紐攻沙衝一自喀勒塔爾
攻黨哩會兵取丹東策定元俊及游擊吳錦江等自章谷渡河據格藏橋哈青
阿天佑出郭宗濟野宗兩隊軍夾攻賊驚潰遂克木巴拉博租薩瑪多監藏布
覺諸地進克吉地官寨及默資溝參將常泰等克黨哩都司李天貴等克沙衝

元俊復克丹東復革布什咱地三百餘里民戶二千餘桂林遣陳定國調綽斯甲布兵駐軍界上備調遣上責桂林不令元俊乘勝取金川元俊旋與散秩大臣阿爾泰劾桂林欺誑及諸罪狀上爲奪桂林職令阿爾泰署四川總督命額駙尙書公福隆安按治未至詔元俊督兵赴綽斯甲布率土兵進攻金川元俊奏自戰失利士氣消沮見在兵力不足并按兩金川請敕調湖南湖北山西甘肅兵二萬分三道進軍計兩月可竟事上以元俊請益師未免張皇令福隆安會阿爾泰阿桂與元俊詳悉覈計上諭軍機大臣謂元俊能治事熟番情但其人似狡猾好事當留意駕馭尋福隆安疏陳所劾桂林狀不實上以方進兵元俊熟番情諸事不必窮究惟言桂林以白金買金川贖被掠官兵罪最重令汪承霈自承出其意承霈以曹司從軍不當與其事當詰汪騰龍成信讞福隆安復疏言騰龍以金屬王萬邦待巴旺布拉底克歸迷道官兵予金爲賞元俊誘萬邦令其札言桂林使贖被掠官兵事爲爲元俊陷上乃怒責元俊奸狡負恩命奪職逮問籍其家參贊阿桂疏言元俊在川日久熟番情爲近邊土司所信

服諸將能取番無出其右臣遇事多與詢商冀收指臂之效乞恩仍留軍中倘奮勉出力使詐使貢原所不廢如剛愎逞私卽據實嚴劾上命留總兵還所籍財產元俊同副都統永平博靈阿等潛赴墨壘進至羣崙乘月督軍登山薄賊卡正大霧我師騰躍入卡克山梁三道礮卡二十有四進克格魯克古金川曾圖佔丹壩官寨綽斯甲布土司發兵往助阿桂奏令元俊增兵往勦未行卒于軍元俊在邊久善馭諸土司往時資諸土司繕帛輒獻元俊必以善者諸土司皆喜元俊出行邊諸土司率妻子出謁以茶菸簪珥視若家人稍不循法度卽訶譴皆悚息聽命打箭鑪微外夾壩出沒元俊至無敢犯行李者諸番小有動靜爭來告以故元俊諸所措置皆中窺要其得罪上亦知其枉旣卒其子猶戍邊四十一年金川平元俊部將張芝元請於阿桂謂元俊有功無罪徒以忤專閥被羅織語甚切阿桂爲疏請赦其子還薛琮陝西咸甯人父翼鳳河南陽鎮總兵琮以廕生入巡捕營累遷四川涼州營參將阿爾泰討金川以琮從克納項邊谷諸碉寨溫福代阿爾泰視師攻巴朗拉琮戰最力又克卡了取

通甲木攻阿仰東山總督桂林與都統鐵保提督汪騰龍將兵取墨壘清令琮將三千人自甲木噶爾金後繞山道應大軍夾擊桂林中道引還卡了又檄鐵保騰龍令退琮深入糧盡待桂林不至桂林令都司廣著赴援賊據高峯曰博六古通險阻廣著師不得度琮督兵直進燬柵十餘奪碉七十餘賊力拒琮督兵仰攻中槍沒於陳軍盡覆同死者都司張清士陳定國等二十五人阿桂破翁古爾壘立祠戰地祀琮等琮在諸將中號能戰元俊與最厚嘗與期旦日會師孰後至當祈琮至後二刻元俊遣騎持刀呼取薛參將頭琮望見笑曰琮頭當與賊不與公也舊前奪數碉反元俊猶爲琮請罪以功論贖乃已及桂林誤琮戰沒元俊憤激論劾卒以是得罪張芝元四川清溪人以千總從副將軍明亮征金川有功積官至越雋營參將金川曾以番僧調軍事芝元言於明亮曰軍事每爲賊知非去其謀滅賊無日矣會大風雪明亮命芝元率數十人僞若以他事出者宿番僧寺中芝元故通番語與僧飲甚歡僧醉眠芝元出寺聚柴焚之僧皆死賊謀斷因招降其衆尋從成都將軍特成額駐兵江卡捕夾堵圍

肯本賊寨焚其碉斃賊甚衆擄懋功協副將臺灣林爽文爲亂芝元率屯練降番佐軍參贊海蘭察等分攻大埔林中林大埔尾三莊芝元爲策應賊據小半天山將軍福康安等自前山進芝元與領隊大臣普爾普領兵別爲一隊夜半先發繞大山夾攻賊後黎明諸軍同抵山麓攀援上賊力拒芝元先登拔其柵斬獲無算并堵賊去路未幾爽文就擒臺灣平擄建昌鎮總兵圖形紫光閣列前二十功臣尋調松潘鎮總兵廓爾喀掠西藏濟噶拉木上命芝元率屯練降番往討之芝元至值大雪山山谷皆滿芝元手大刀指揮士卒皆感激用命賊敗走廓爾喀再叛芝元偕提督成德督兵攻聶拉木守拍甲嶺隘口斷賊援聶拉木遂下乘勝攻濟噶復克之賊懼乞降未幾卒五十八年諭平定廓爾喀功再圖形紫光閣列後十五功臣芝元少以小校事元俊後乃雪元俊枉人以是多芝元亦益賢元俊能知人也

董天弼字霖蒼順天大興人自武進士授四川提標前營守備乾隆初師征金川天弼在軍有功累遷維州協副將金川酋郎卡攻丹壩土司天弼偕游擊宋

元俊諭耶卡歸所掠毀所築碉兵罷還松潘鎮總兵旋擢四川提督郭羅克部劫西藏入貢喇嘛上命天弼按治未得其渠詔責其苟且三十五年小金川土司澤旺子僧格桑爲亂攻鄂克什土司色達克拉圍其寨天弼督兵駐達木巴宗檄僧格桑歛兵退色達克拉以其樂糧盡乞徙達木巴宗天弼與總督阿爾泰議留兵戍焉三十六年僧格桑復圍達木巴宗並略木耳宗巴朗拉諸地天弼自打箭鎗出邊徵省標及松潘雜州諸鎮協兵行至眠龍岡賊已得巴朗拉築抗卡爲久守計且斷我兵路天弼議襲山神溝以解達木巴宗圍尋將四百人自山神溝至德爾密克碉七賊竄走再進取畢旺拉賊乘霧來犯土兵驚潰德爾密畢旺拉皆陷天弼疏請罪上以天弼所將兵本少總督阿爾泰不預策應援宥其罪諭以當奮勉再不努力獲罪滋重矣天弼復將五百人自木坪陟堯磧順山攻甲金達對面山梁取碉二天弼以鄂克什牛廠當要道分兵嚴守廠賊駐軍其地乘勝上下截擊木坪鄂克什諸土司錯壤要隘皆爲我軍有未幾賊復襲據牛廠上以阿爾泰師久無功奪官因責天弼始終貽誤與阿爾泰

同罪奪官留軍中充伍如更退縮正軍法尋命下成都獄詔未至天弼以甲金達山峻不可上求間道得溝在兩崖間會大風雪天弼率兵自溝中潛度遂至達木巴宗繫僧格桑色達克拉潰圍出並克木耳宗迎溫福師與會上聞命貨死留軍中阿桂令天弼監火藥軍械三十七年師克資哩阿桂令天弼將五百人駐焉尋子副將銜授重慶鎮總兵命督兵赴曾頭溝進至核磨核磨土婦請以千人從事聞賜花翎天弼督兵攻堪卓溝自間道出納雲達深入賊境五十餘里克山梁三破礮卡三十餘木城三迎溫福師會於布朗郭宗克大板昭木了寨得礮三十六卡十六上以溫福已得布朗郭宗進克底木達天弼所克不過空寨疏語頗鋪張手敕戒之尋授領隊大臣三十八年復爲四川提督時小金川已定溫福督師進討大金川令天弼以五百人守底木達溫福進駐木果木號大營底木達當賊來路爲要隘溫福檄三百人益大營又去其後援時溫福以軍屢勝不以賊爲意金川頭人七圖葛拉爾思甲布等以千餘人詐降溫福使與斯養雜處因誘諸降人爲變趁底木達兵弱無後援六月乙丑朔潛自

山後擁衆攻底木達天弼率所部二百人抽刀力戰至夜半賊以爲槍數百環擊殺之越九日却大營溫福亦死焉上先命天弼駐丹墻旋命移駐布朗郭宗軍中傳賊來犯時天弼方屯美諾上命奪官速治總督劉秉恬疏言天弼自美諾馳赴底木達途遇賊右脅中槍死仍以貽誤軍事籍其家戍其子舉人聯發伊犁金川旣平獲七圖葛拉爾思甲布傳送熱河行在廷訊具言天弼死事時力戰狀乃敕聯發還授內閣中書

柴大紀浙江江山人自武進士授福建守備累擢至海壇鎮總兵移臺灣鎮乾隆五十一年十一月林爽文亂起爽文漳州人徙彰化所居村曰大里杙時羣民相聚號天地會漳州人莊燦爲之魁爽文與相結謀爲變臺澎知府孫景燧馳詣彰化督知縣俞峻副將赫生額游擊耿世文捕治焚數小村以怵之爽文因民怨夜糾其徒來襲赫生額等皆戰死明日遂破彰化景燧亦殉焉傍攻諸羅鳳山皆陷大紀時以總兵守府城賊分道來攻大紀出駐鹽堤橋禦之擊沈賊舟數十滅千餘五十二年春水師提督黃仕簡陸路提督任承恩先後赴援

大紀出攻諸羅克之卽移軍守諸羅旋以守府城功賜花翎上以仕簡承恩師久無功授總督常青將軍渡臺灣視師與文攻諸羅自二月至四月凡十至大紀督游擊楊起麟守備卽能成等出戰殺賊數千與文之徒張慎微僞降大紀察其詐實諸法臺灣諸府縣皆編竹爲城不耐攻大紀以忠義率兵民誓堅守上嘉大紀勞賜荷包奶餅下部議叙六月授福建陸路提督仍兼領臺灣總兵鹽水港者諸羅通府城糧道也賊來攻大紀力禦之上促常青赴援予大紀壯健巴圖魯名號參贊軍務八月上以常青衰老不能辦賊命福康安爲將軍仍令大紀參贊而常青令總兵魏大斌援諸羅賊邀諸途退駐鹿仔草復令總兵蔡攀龍援諸羅大紀出戰迎入城共守上移大紀水師提督而以陸路提督授攀龍十一月加大紀太子少保上以諸羅被圍久縣民困守奮力向義更縣名爲嘉義賊攻城益急上密諭大紀不必堅執與城存亡如遇事急可率兵力戰出城再圖進取大紀疏言諸羅居臺灣南北之中縣城四周積土植竹環以深濠濠上爲短垣置礮防衛堅固一旦棄之而去爲賊所得慮賊勢益張鹽水港

運道亦不能守且城廂內外居民及各莊避難入城者共四萬餘人助饑協守以至於今不忍將此數萬生靈付逆賊毒手惟有竭力保守以待援兵上手詔謂所奏忠肝義胆披覽爲之墮淚大紀被圍日久心志益堅勉勵兵民忍飢固守惟知以國事民生爲重古之名將何以加之因封爲一等義勇伯世襲罔替並命浙江巡撫琅玕予其家白金萬促福康安赴援十一月福康安師至嘉義圍解大紀出迎自以功高拜爵賞又在圍城中倥偬不具幾禮福康安銜之遂劾大紀詭詐深染綠營習氣不可倚任上諭謂大紀駐守嘉義賊百計攻圍督率兵民力爲捍衛朕諭以力不能支不妨全師而出大紀堅持定見竭力固守不忍以數萬生靈委之於賊朕閱其疏爲之墮淚福康安乃不能以朕之心爲心乎大紀嘗奏賊以車載槍礮攻城今福康安言得賊攻城大車又委棄槍礮爲我軍所得足見大紀前奏不虛大紀又奏縣城食盡地瓜花生俱罄以油糗充食當時義民助饑未必遽至於此但大紀望援心急以食油糗爲詞普吉保恒瑞兩軍尙復觀望不進若云猶有餘粟則兩路赴援更緩此時縣城存亡

未可知安怪大紀過甚其詞耶大紀屢荷褒嘉在福康安前禮節或有不謹致爲所憎直揭其短福康安當體朕心略短取長方得公忠體國之道侍郎德成自浙江奉使還受福康安指計大紀上命福康安李侍堯徐嗣曾琅玕按治福康安臨致書軍機大臣言大紀縱兵激民爲變其守嘉義皆義民之力大紀聞命欲引兵以退義民不令出城乃罷事聞上諭謂守諸羅一事朕不忍以爲大紀罪至其他聲名狼藉縱兵激變諸狀自當按治命奪大紀職逮問福康安尋以大紀縱弛貪黷貽誤軍機議斬送京師上命軍機大臣覆讞大紀訴冤苦並言德成有意周內迫嘉義民證其罪下廷訊大紀猶力辨五十二年七月辛巳命如福康安議棄市其子發伊犁爲奴

論曰元俊天弼在邊久熟情僞習形勢諸番仰其威惠元俊阨於桂林激而欲自白不得直徼阿桂右之罪且不測天弼又見嫉於溫福驅至寡之兵以投方張之寇旣死猶尙以爲罪若大紀有功無罪爲福康安所不容高宗手詔可謂曲折而詳盡矣乃終不能貸其死軍旅之際捐肝腦冒鋒刃求尺寸之效困於

媚嫉功不成而死於敵若功成矣而又死於法嗚呼可哀也已

清史稿

列傳一百十七

福康安

孫士毅

明亮

福康安字瑤林富察氏滿洲鑲黃旗人大學士傅恒子也初以雲騎尉世職授三等侍衛再遷頭等侍衛擢戶部侍郎鑲黃旗滿洲副都統師征金川以溫福爲定邊將軍阿桂豐昇額爲副將軍高宗命福康安齎印往授之卽授領隊大臣三十八年夏至軍阿桂方攻當噶爾拉山留福康安自佐木果木師敗溫福死事復命阿桂爲定西將軍分道再舉攻喇穆喇穆福康安督兵克其西各碉與海蘭察合軍克羅博瓦山北攻克得斯東樂賊夜乘雪陟山襲副將常祿保營福康安聞槍聲督兵赴援擊之退賊屯山麓乘雨築兩碉福康安夜率兵八百冒雨踰碉入殺賊毀其碉上手詔嘉其勇進克色溯普山破堅碉數十殲賊數百又與額森特海蘭察合軍攻下色溯普山南賊碉遂盡破喇穆喇穆諸碉卡並取日則了口再進克嘉德古碉攻遜爾克宗西北寨賊潛襲我軍後福康

安擊之退賊以距勒烏圍近屢夜出擊我師福康安與戰屢勝阿桂慮賊守隘不時下改道自日爾巴當噶路入檄福康安攻下達爾扎克山諸碉再進攻格魯克古率兵裹糧夜踰溝攀崖自山隙入當噶海寨克陡烏當噶大碉桑噶斯瑪特木城石卡再進克勒吉爾博寨阿桂令福康安將千人從海蘭察赴宜喜自甲索進攻得楞山焚薩克薩古大小寨數百渡河取斯年木咱爾斯嶺二寨再進次榮噶爾博山棚內大臣賜號嘉勇巴圖魯再進至章噶福康安偕額森特攻巴木圖登直古腦山拔木城碉寨五十焚冷角寺遂克勒烏圍阿桂令取道達烏圍進攻噶拉依分其軍爲七隊福康安率第一隊奪達沙布碉當噶克底紮爾丹諸寨爲木柵斷科思果木走雅瑪朋道進克達噶木碉二阿稱曲前峯碉木城各二十焚奔布魯木獲起寨取舍勒圖租魯傍碉一寨二格什格章寨一薩爾歪碉寨三阿結占寨二陟科布曲山梁盡得科布曲諸寨四十一年春再進克舍齊雍中二寺自拉古爾河出噶拉依之右移礮擊其寨噶拉依既下金川平論功封福康安三等嘉勇男師還郊勞賜御用鞍轡馬一飲至賜綬

十二端白金五百圓形紫光閣賜雙眼花翎授正白旗滿洲都統出爲吉林盛京將軍授雲貴總督南掌貢象自陳爲交趾所侵乞以餘象易礮福康安諭以國家法制有定還其象不予礮疏入上深聽之移四川總督兼署成都將軍四川莽民爲寇盜號咽喉命福康安捕治逾年福康安疏言盜已徐戢陳善後諸事擢御前大臣加太子太保召還京署工部尙書授兵部尙書總管內務府大臣四十九年甘肅回川五等立新教糾衆爲亂授參贊大臣從將軍阿桂討賊旋授陝甘總督師至降德川五之徒馬文煊出降攻雙峴賊卡賊拒戰阿桂令海蘭察設伏福康安往來督戰殲賊數千遂破石峯堡擒其渠以功進封嘉勇侯轉戶部尙書協辦大學士五十二年臺灣林爽文爲亂命福康安爲將軍而以海蘭察爲參贊大臣督師討之時諸羅被圍久福建水師提督柴大紀堅守上褒大紀改諸羅爲嘉義以旌其功陸路提督蔡攀龍督兵赴援圍未解福康安師至道新埤援嘉義與賊戰崙仔頂克俾長等十餘莊會日暮雨大至福康安令駐師土山巔賊經山下昏黑無所見發銃仰擊福康安戒諸軍士毋

動既署兩廣海蘭察已自他道入師與會圍解進一等嘉勇公賜紅寶石帽頂
四團龍補服大紀以方在圍中謁福康安未具葵鞭禮福康安銜之疏論大紀
飭法牟利諸罪狀並及擎龍陳戰狀不實上以大紀困危城久擎龍亦有勞意
右之詔謂二人或稍涉自滿在福康安前禮節不謹爲所憎遂直揭其短戒福
康安宜存大臣體然大紀卒以是坐死時論冤大紀亦深非福康安嫉能不若
傅恒遠也福康安復劾擎龍左遷而福州將軍恒瑞師逗遛不進福康安與有
連力庇之詔亦斥其私福康安既解嘉義圍令海蘭察督兵追捕爽文檻致京
師復得副賊莊大田臺灣平賜黃腰帶紫韁金黃辮珊瑚朝珠命臺灣嘉義皆
建生祠塑象再圖形紫光閣疏請募熟番補屯丁並陳善後諸事要在習戎事
除奸民清吏治肅郵政上悉從之旋授閩浙總督五十四年安南阮惠攻黎城
孫士毅師退上移福康安兩廣總督詔未至福康安疏請往莅其事上獎福康
安忠謂大臣視國如家休戚相關當若此也惠更名光平乞輸款福康安爲疏
陳請罷兵上允之御史和琳劾湖北按察使李天培爲福康安致木材令湖廣

糧船運京師福康安疏請罪上手詔謂阮光平方入朝特寬之命奪職留任仍
罰總督俸三年公俸十年五十五年福康安率光平朝京師以獲盜免罰總督
俸五十六年廓爾喀侵後藏命福康安爲將軍仍以海蘭察爲參贊大臣督師
討之免罰公俸五十七年三月福康安師出青海初春草未盛馬瘠糧不給督
諸軍速進行四十日至前藏自第理浪古如絨轄崑拉木察地勢疾行向宗喀
至轄布基諸道兵未集督所部分六隊趨標木潛登山賊前後二礮殲賊渠三
賊二百餘擒十餘進次瑪噶爾轄爾甲山梁賊渠手紅旗擁衆登令設伏誘賊
進至山半伏起橫擊擐旗賊盡殲進攻濟隴濟隴當賊要隘大礮負險旁列諸
礮卡相與爲犄角乃分兵先剿其旁諸礮卡併力攻大礮縛大木爲梯督兵附
礮登毀壘戰自辰至亥克其寨斬六百擒二百捷聞上爲賦誌喜詩書扇並解
御用佩褱以賜六月自濟隴入廓爾喀境進克索勒拉山度熱索橋東越峨緣
山自上游潛渡越密里山攻旺噶爾克作木古拉載山梁攻噶勒拉堆補木諸
山破甲爾古拉集木集兩要寨轉戰深入七百餘里六戰皆捷上詔褒福康安

勞授武英殿大學士福康安恃勝軍稍怠督兵冒雨進賊爲伏以待台斐英阿戰死廓爾喀使請和福康安允之廓爾喀歸所掠後藏金瓦寶器令大頭人噶木第馬達特塔巴等齎表進象馬及樂工一部上許受其降師還加賜福康安一等輕車都統昇其子德麟授領侍衛內大臣視王公親軍校例置六品頂戴藍翎三缺官其僉從復圖形紫光閣大學士阿桂讓福康安居首福康安初征金川與海蘭察合軍討亂回同爲參贊及征臺灣定廓爾喀皆專將海蘭察爲參贊師有功受殊賞上手詔謂福康安能克陽布俘拉特納巴都爾巴都爾薩當酬以王爵今以受降班師不克副初願然福康安孝賢皇后姪大學士傅恒子進封爲王天下或議朕厚於后族富察氏亦慮過盛無益今如此歲事較蕩平廓爾喀倍爲欣慰陽布廓爾喀都城拉特納巴都爾等其渠名也五十八年疏陳西藏善後十八事詔從之安南國阮光平卒上慮其國且亂命福康安如廣西福康安母卒於京師令在任守制福康安途中病命御醫往視福康安疏言安南無事乞還京師冀得廬墓數日詔許之加封嘉勇忠銳公移四川總督

旋又率金川土司入覲恒秀時爲吉林將軍以采參虧庫帑累民命福康安蒞
諭擬罪輕上責福康安袒戚誼復移雲貴總督方寒賜御服黑狐大領褂六十
年貴州苗石柳鄧湖南苗吳半生石三保等爲亂命福康安討之柳鄧圍正大
營嗅腦營松桃廳三城福康安師至力戰次第解三城圍賜三眼花翎福康安
率貴州兵破老虎岩賊寨調得柳鄧蹤迹和琳時爲四川總督將四川兵來會
攻滿華寨焚賊寨四十柳鄧入湖北投三保三保方圍永綏廳福康安督兵赴
援師當渡賊築卡拒守分兵出上流縛筏縱民牧牛設伏待賊至掠牛伏起奪
賊船所縛筏亦順流至師盡濟攻石花寨越得山拉戰殺賊甚衆令總兵花連
布間道援永綏師從之戰三日圍解進次竹子山賊屯蘭草坪西北崖以板爲
寨樹旗東南山闕乃設伏對山仍督兵若將自山闕入賊來戰伏兵發礮賊潰
退保礪木陀山再進克之山西爲登高坡與黃瓜山對分兵出五道冒風雨克
黃瓜山焚寨五十六攻蘆蔴寨奪大小喇耳山焚寨四十半生三保悉衆拒戰
分兵攻雷公山阻其援兵擊破西梁山下三寨再進至大烏草河循河克沙

兜寨盤基坳山戰於板登寨再戰於雷公灘賊屢敗取右哨營渡河於羣山中越險進克馬蝗衝等大小寨五十至狗腦坡山益險兵皆附葛藤冒矢石行陟其巔破賊寨再進克蝦蟇峒烏龍巖攻茶它降者七十餘寨上移福康安閩浙總督進封貝子再進克巖碧山焚巴溝等二十餘寨再進攻壓手寨山總兵花連布將廣西兵克苗寨四十賜貂尾掛圍高多寨吳牛生窮蹙出降上官福康安子德麟副都統在御前侍衛上行走再進攻鴨保寨鴨保右天星寨爲賊中奇險處督兵自雪中求道進取木城七石卡五克垂藤董羅諸寨賜御服黃裏元狐端罩旋克大小天星寨進攻楊木營乘風雪夜進拔地良八荊桃花諸寨自平隴復乾州盡克擒頭坡騾馬峒諸隘焚其寨三百嘉慶元年再進克吉吉寨大隴峒等寨戰於高吉陀再戰於兩岔溪屢敗賊賊襲楊木營攻擒頭坡皆有備敗走克結石岡焚牧牛坪等大小寨七十進克官道溪再進攻大麻營石城至廖家衝奪山巔石卡夜間道出連峯坳奪山梁七上褒福康安命贈傅恒貝子福康安染疫病作猶督兵進五月卒於軍仁宗製詩以誄命加郡王銜

從傅恒配太廟說文襄子德麟襲貝勒遜降至未入八分公世襲罔替福康安受高宗殊寵師有功在軍中習奢侈犒軍金幣輒巨萬治饌吏承意指糜濫滋甚仁宗既親政屢下詔戒諸將帥毋濫賞必斥福康安德麟迎喪歸將吏具賄四萬有奇責令輸入萬德麟旋坐等壇視牲誤班降貝子

孫士毅字智治一字補山浙江仁和人少穎異力學乾隆二十六年進士以知縣歸班待銓二十七年高宗南巡召試授內閣中書充軍機章京遷侍讀大學士傅恒督師討緬甸以士毅典章奏叙勞遷戶部郎中擢大理寺少卿出爲廣西布政使擢雲南巡撫總督李侍堯以贓敗士毅坐不先舉劾奪職遣戍伊犁錄其家不名一錢上嘉其廉命纂校四庫全書授翰林院編修書成擢太常寺少卿復出爲山東布政使擢廣西巡撫移廣東初上官疏言廣東海洋交錯奸宄易藏惟有潔以持身嚴以察吏不敢因循諱飾上諭以勉效李湖湖爲廣東巡撫以風厲有聲爲上所深賞也尋署兩廣總督陝甘總督福康安議練兵詔下雲貴四川兩廣福建諸行省令仿行士毅疏請廣東練水陸兵二萬八千五

百三十二人廣西練兵一萬一千二百九十六人選人材精壯技藝嫺習責督撫提鎮實心訓練請嚴立科條以懲積習上諭曰此可徐徐爲之而必以實尋還巡撫任廣東民悍多通賦州縣吏當上計或以私財應冀課最民益延抗爲得計士毅詳覈積逋遣幹按治通賦最多諸州縣自乾隆四十年後具冊督追州縣吏以私財應計政者察無他私弊以督追所得償之上獎其能惟謂州縣吏職催科乃以不能振作民多通賦以私財應計政不罪其誑已爲寬典若以督追所得償之將何以示儆令續徵通賦當悉入官茭塘者羣盜所聚拒捕傷官士毅擒其渠戮以徇上復嘉其能賜花翎兩廣總督富勒渾縱其僕受賂事聞下士毅按治得實富勒渾坐譴上以士毅持正卽遷兩廣總督富勒渾疏論廣東鹺政請增運艘按季徵餉價復三十九埠運商清積逋士毅受事疏言增運艘當去封押之擾定經久之規俾新舊船戶皆各樂從按季徵餉價當復舊例歲終奏銷三十九埠運商以通課黜中鉛山南康上猶英德四埠當先復清積逋當自三十九埠始皆下部議行五十二年臺灣林爽文爲亂士毅詣潮州

戒備師行遣兵助剿芻茭器械皆立辦加太子太保賜雙眼翎一等輕車都尉
世職五十三年臺灣平圖形紫光閣會安南國王黎維祈爲其臣阮惠所逐其
母妻叩關告變士毅以聞督兵詣龍州防鎮南關帝嘉其識輕重知大體命自
廣西入安南別遣雲南提督烏大經自蒙自進阮惠遣將拒於壽昌江又分兵
屯嘉觀士毅師至擊破惠所遣將渡壽昌江再進至市球江惠守備甚設士毅
令陽於下游爲浮橋若將渡密遣總兵張朝龍自上游渡出賊後賊恇擾士毅
勅兵乘筏渡賊棄寨走縱擊賊自投江中死尸蔽江游擊張純等亦擊破惠屯
嘉觀軍副將慶成等設伏擒惠將師再進至富良江江南卽黎城惠令盡收戰
艦泊南岸拒守士毅縛筏載兵令提督許世亨將二百人夜過江掠小舟數十
更番渡兵黎明兵渡者二千餘惠軍以舟遁張純追及之分焚其舟盡殲之遂
復黎城阮惠走富春維祈至軍中士毅承旨封爲安南國王捷聞封一等謀勇
公賜紅寶石頂士毅辭不許命班師士毅猶豫未卽行五十四年春正月阮惠
率其徒攻黎城維祈亦挈其孥潛遁士毅引兵退渡市球江駐江北惠軍追至

總兵李化龍殿度浮橋墮水死浮橋斷提督許世亨等皆戰死士毅還入鎮南關維祈與母子偕至置諸南甯上以士毅不遵詔班師有此挫折罷封爵並撤紅寶石頂雙眼花翎解總督任以福康安代之方惠追我師至富良江士毅欲復渡江與決戰世亨力諫謂損大臣傷國體令千總薛忠挽其輜而退至是具疏自劾令駐鎮南關治事惠尋遣使求內附福康安至與士毅賅斥之既以黎氏督亂不堪復立國遂偕奏安南不必用兵狀帝從其議尋召士毅還京師授兵部尚書授軍機大臣直南書房是年冬命署四川總督逾歲員除未幾兩江總督書麟坐高郵書吏僞印冒徵被譴以士毅代之諭以江南吏治廢弛久當臆勉整飭毋徇隱徐州王平莊河決築毛城鋪隄堰賑被水諸州縣俱稱旨五十六年召授吏部尚書協辦大學士廓爾喀用兵命攝四川總督督饒士毅自打箭爐出駐察木多師已入後藏復馳詣前藏餽餉無匱以勞復賜雙眼花翎五十七年廓爾喀平再圖形紫光閣旋授文淵閣大學士兼禮部尚書偕福康安和琳駐前藏謀善後福康安率金川土司入覲命士毅再權四川總督福康

安移雲貴總督以和琳代之上令士毅留四川董理討廓爾喀之役軍需奏銷
士毅乞留福康安和琳會覈上不許六十年年湖南苗爲亂入四川秀山境士
毅督兵駐守擊賊嘉慶元年湖北教匪爲亂侵四川酉陽境士毅移軍來鳳戰
屢勝封三等男賊屯茶園溪大雨旬日調無備夜擊賊人持短兵坐湧入千總
張超執長矛先登斬其魁追奔四十餘里賊退據旗鼓寨士毅移軍從之六月
卒於軍中贈公諡文靖以其孫均襲伯爵士毅故善和珅病篤遺書請入旗
高宗特許之命均入漢軍正白旗授散秩大臣尋以幼罷十一年自陳廢疾請
以同祖弟玉墀襲爵仁宗諭曰士毅克黎城皇考命班師士毅意在貪功遲延
失事兵潰入關所奏多有虛飾朕體皇考遺意未予追求今均既病廢士毅原
授伯爵當裁撤并令均出旗歸原籍

明亮當察氏滿洲鑲黃旗人都統廣成子亦孝賢高皇后姪也初以諸生尙履
親王允禩女爲多羅額駙授整儀尉累遷鑾儀衛鑾儀使乾隆三十年授伊犁
領隊大臣從征烏什亂回再移甯古塔副都統從征緬甸有功三十六年兩金

川爲亂命以護軍統領佐四川總督桂林出師明年桂林師出黑壘溝敗績明亮未以聞上責其隱奪職旋授頭等侍衛銜令從軍自効時阿桂以參贊大臣代將令明亮仍出黑壘溝潛襲甲爾木奪第一山梁地高寒不俟令引還阿桂奏勅降二等侍衛銜復攻甲爾木乘雪陡其中峯克所築礮卡授二等侍衛尋攻眞登梅列斷賊糧道遷頭等侍衛加副都統銜復自都恭進破噶察丹嘉諸寨與阿桂會於價格宗阿桂授副將軍命明亮爲領隊大臣再進自價格宗渡河東攻美諾令侍衛德赫布等爲前隊明亮繼逐賊至美都喇嘛寺圍美諾戰一晝夜克之小金川悉定進討大金川溫福出西路豐昇額出北路而阿桂出南路明亮爲參贊三十八年正月師次當噶爾拉山亘二十餘里賊築十四礮拒守明亮攻克第五第四兩礮居數月溫福師敗價格宗美諾皆陷從阿桂歛師退駐翁古爾壘擢廣州將軍十月師再舉阿桂出西路授明亮定邊右副將軍出南路當一面自思紐順河取得里得木甲諸寨毀破宅壘復取價格宗與阿桂會美諾小金川復定賜御用黑狐冠三十九年正月與阿桂策定進軍道

明亮自己旺布拉克底土司進次馬奈馬奈山峻險河南有地曰斯第爲賊寨障明亮夜攻馬奈遣參贊大臣富德自駱駝溝出寨後來攻戰二日克之再進次絨布寨分兵授領隊大臣奎林以皮船渡河取斯第山梁木城二再進攻卡卡角其前地曰庚額特山負河而立危峯護其右勢絕險山腰徑隘賊夾以巨礮屢攻不能下於其右築五礮衛饒道攻穆谷諸寨賊拒守益力而奎林軍以乏水移駐深嘉卜明亮調得泉使富德奎林移軍就之分道攻斯第賊前後並至斷我軍爲數部戰甚力侍衛阿爾都陟險焚賊卡乃破圍出明亮策攻正地深入不遇賊廬阻險設伏未卽進阿桂令改出北路與參贊大臣舒常合軍攻宜喜進克達爾圖山梁賊築十八礮迭戰克其十五復自木克什進次帶石東取谷爾提西攻沙壩山焚礮卡二百餘賊據隘斷我軍道別得道出四十年四月阿桂令參贊大臣海蘭察助攻宜喜分兵十餘道攻賊礮明亮與海蘭察舒常巡行督戰克薩克薩谷山梁達爾圖得楞沙壩山諸賊皆潰並得日旁諸寨授內大臣再進克基木斯丹當喇山海蘭察還佐阿桂明亮軍進次扎烏古攻

調未卽下令奎林以礮擊賊破石真噶北取琅谷移師駐其地阿桂已克勒烏圍進攻噶拉依令明亮攻礮占未卽下明亮疏請簡精銳佐阿桂併力出西路上不謂然詔切責乃自琅谷進攻納木迪阿桂遣駐美諾兵千餘助明亮明亮策賊守納木迪扎烏古備必疏遣奎林出間道襲破之自日斯滿至阿爾古山梁上下二十餘里諸碉卡盡下納木迪賊焚寨走再進攻日斯滿先取得耳谷斷賊後路令和隆武等夾擊大破賊還攻礮占礮占爲乃當山巔其北曰阿爾占其南曰甲雜明亮襲破阿爾占夜督兵縋下峭壁陟山梁盡破諸碉寨遂攻乃當賊潰遁圍甲雜缺一面當水賊走師乘之皆墮水死阿桂軍臨噶拉依明亮取獨松趨正地降馬爾邦令奎林等軍於巴布朗谷督兵與阿桂軍會偕阿桂疏報噶拉依圍合四十一年春命封一等襄勇伯賜雙眼花翎師克噶拉依金川平時議以成都將軍駐雅州總邊政以授明亮明亮以雅州地隘請還駐成都陳善後諸事皆從之夏師還上郊勞賜銀幣鞍馬冬復率諸土司入覲命在軍機處行走四十三年改授四川提督四十五年復率諸土司入覲四十六

年甘肅撒拉爾回亂攻蘭州明亮將四川兵自鞏昌入甘肅合軍討賊上幸木蘭觀行在改授烏魯木齊都統員外郎開泰罪譴命永遠枷號明亮徇協領富通請釋之未以聞四十八年移伊犁將軍而富通當引見開泰懼失庇投水死事聞上逮明亮詣京師獄成罪絞待決四十九年甘肅固原回復亂大學士阿桂出視師命釋明亮賜藍翎侍衛從軍亂定授頭等侍衛累遷鑲紅旗蒙古都統五十五年授刑部尙書五十六年出爲黑龍江將軍五十八年移伊犁將軍六十年復入爲正紅旗漢軍都統坐在黑龍江令兵輸貂子賤值奪職留烏魯木齊自效貴州苗石柳鄧湖北苗石三保等爲亂嘉慶元年命明亮出佐湖南軍授頭等侍衛旋以副都統銜署廣州將軍賊久據孝感署湖廣總督永保討之未克明亮將三千五百人以往至潼川鋪賊出戰分兵伏黃金廟攻賊壘伏起賊礮裂斂入城明亮令積柴城門外縱火賊突山皆墮濠三日火始燼城遂破賜輕車都尉世職攻鍾祥得賊渠張家瑞等戰於雙溝屯呂堰賊至擊敗之再進攻平隴破養牛塘剛息衝諸隘圍石隆奮戰斬石柳鄧獲其孥封二等襄

勇伯賜雙眼花翎是時教匪起延及四川陝西湖北三省命明亮督兵赴四川與總督宜綏合軍討賊二年明亮自永綏入四川與宜綏軍合轉戰焚金峨寺破重石子香爐坪克分水嶺火石嶺諸卡賊渠王三槐山戰大破之三槐中槍逸賊死者萬餘人復戰精忠寺俘三槐母襄陽賊渠姚之富齊王氏等竄四川與三槐及達州賊渠徐添德合勢復張之富等據開縣南天洞明亮擊破之逐賊戰於大涼山雲陽賊渠高名貴應賊明亮與宜綏策禽名貴殲其從賊攻白帝城明亮循江下宜昌賊來犯擊破之逐賊至獨樹會湖廣總督景安師至合擊逼賊入南漳山中度賊且渡漢北入河南境令總兵長春屯穀城爲備督兵出隆中賊北走擊之潰賜紫帽賊屢敗不能北渡乃自房縣入陝西境明亮逐賊屢戰皆捷先後殺六千餘人賊走紫陽明亮師次白沔峽之富等與諸賊渠張漢潮高均德分道竄走明亮逐漢潮均德入漢中上賁明亮不當置羣盜而但逐漢潮均德奪爵及雙眼花翎紫帽之富等亦渡江與均德合走漢陰其徒入城固南鄭乃奪職逮詣京師旋以軍事急命留軍自効督兵逐之富齊王氏

自山陽至鄖西急擊之之富齊王氏皆投崖死賜副都統銜花翎命捕治均德師進次西鄉漢潮與諸賊渠詹世爵李槐合萬餘人自竹谿至平利太平明亮追及於池子山戰馘世爵槐而漢潮還走南鄉復攻陷西鄉石泉命奪花翎漢潮入河南境攻盧氏明亮赴援漢潮復走陝西攻五郎廳四年上授勒保經略大臣授明亮副都統參贊大臣逐漢潮入漢中勒保弟永保先以孝感鍾祥勦賊無功坐譴嫉明亮至是起署陝西巡撫與明亮不相能漢潮往來奔竄不以師應上徵勒保還命明亮代將遷正紅旗漢軍都統明亮効永保軍久駐不進永保言明亮有手扎尼其移軍上爲奪明亮職逮詣京師明亮方追賊入子午谷戰於張家坪殲漢潮師還就逮罪斬待決五年上追錄前功以領催詣湖北從陝甘總督松筠討賊旋授藍翎侍衛領隊大臣敗賊石花街遷二等侍衛再敗賊斑竹園遠安鎮命以五品銜授宜昌鎮總兵賊窺荊襄明亮與戰敗之賊欲西走陝明亮守七星關賊復折而東戰於朱家嘴大破賊進秩視三品賊復入陝西境明亮與巡撫倭什布合擊之賊還南竄上命赴四川討賊明亮以陝

西賊渠高二馬五等將至竹谿馳赴迎擊上賁明亮不卽赴四川復左授藍翎侍衛明亮已擊破高二馬五復擢三等侍衛領隊大臣還師湖北戰於壽陽坪破賊渠徐添德戰於獅子巖余家河破賊渠苟文明復授宜昌鎮總兵時湖北賊漸定上念明亮老召還授二等侍衛七年自副都統外授烏魯木齊都統三省教匪平行賞封一等男九年內授都統遷兵部尙書十年進一等子十四年加太子少保進三等伯十五年賜雙眼花翎命協辦大學士十六年以輿夫聚博上聞不以實奏左授副都統十七年出爲西安將軍十八年內授都統左都御史十九年復授兵部尙書協辦大學士二十二年授武英殿大學士進太子太保二十四年進三等侯道光元年致仕食全俸二年卒年八十七宣宗親臨奠賜陀羅經被諡文襄祀賢良祠

論曰福康安起戚里然亦自知兵征廓爾喀賊守隘命前軍更番與戰而設伏隘側前軍敗退賊遂出隘伏起賊駭走我軍燧之入隘福康安策騎督戰諸軍悉度隘遂夷賊屯其才略多類此士殺入安南度重險窺入其庭是時諸將多

驕侈士殺獨廉蓋亦有不可沒者明亮知兵過福康安廉倖士殺師康有功輒有齟之者未能竟其績立朝既久躬享上壽進受封拜非倖致也

清史稿

列傳一百十八

海蘭察

奎林

和隆武

額森特

普爾普

海蘭察多拉爾氏滿洲鑲黃旗人世居黑龍江乾隆二十年以索倫馬甲從征準噶爾輝特台吉巴雅爾既降復從阿睦爾撒納叛師索之急遁入塔爾巴哈台山中海蘭察力追及之射墜馬生獲以歸叙功賜號額爾克巴圖魯累擢頭等侍衛予騎都尉兼雲騎尉世職圖形紫光閣三十二年以記名副都統從征緬甸師出虎踞關海蘭察率輕騎先驅至罕塔遇賊殪三人俘七人遂攻老官屯敵二百設伏殲賊四百賊自猛密出襲我師援擊却之三十二年再出師度萬仞關敗賊曼鳩江燬江岸賊居授鑲黃旗蒙古副都統師薄老官屯攻賊於錫箔毀其木柵賊來攻急擊之追戮其強半縛二人以歸既還師命留軍防邊移鑲白旗蒙古副都統三十六年師征金川命自雲南赴四川與師會三十七

年六月參贊大臣豐昇額方攻美美寨賊禦戰甚力海蘭察師至合力奮擊克之乘勝毀賊寨十三克木城師屯其旁山岡築卡以守七月敗賊策卜丹八月賊出貢噶山左謀截糧海蘭察設四伏斬級百餘十月進攻路頂宗及喀木色爾破碉卡三百餘殲賊數百詔嘉獎擢正紅旗蒙古都統十一月進至格寶迪自色木僧格山後取瑪覺烏大寨仰攻布喇克及扎喀爾寨得碉卡九十二月進攻明郭宗突入寨門焚轉經樓直搗美諾小金川既定進討大金川授參贊大臣從將軍溫福出西路自功噶爾拉入三十八年二月趨昔嶺道經蘇克奈奪卡二據木果木後山與領隊大臣額森特軍合戰得碉卡五鑿冰開道一日而至固木卜爾山山接昔嶺麓昔嶺多賊碉當道碉凡十我師遇賊碉若山峯縱橫並列往往爲之次第便指目海蘭察與額森特計分兵爲六隊力攻第九第十二碉先下進取第七第八兩碉力戰冰雪中及暮陽撤兵賊下追伏起殪二百人第五碉尤堅厚海蘭察連礮轟擊晝夜無稍休碉乃破移軍攻達扎克角山梁奪獲得斯東寨上按地圖示諸將形勢海蘭察復移軍攻功噶爾拉

山口五月還攻昔嶺造礮臺高與山齊痛殲守賊六月後路賊攻陷底木達進據登春海蘭察還禦戰正力俄聞木果木大營有警疾馳次日大營陷將軍溫福歿於陣海蘭察令領隊大臣富興整兵出而爲之殿夜半年至功噶爾拉總兵牛天昇營度功噶爾拉亦不可守合軍引退令額森特等爲前導與富興普爾普及天昇殿是日暮屯崇德次日至美諾與領隊博清額五岱和隆武合軍馳奏請罪上諭以鎮靜鼓士氣圖恢復與五岱共守美諾賊屢來攻均戰退時當新敗綠營兵多潰散海蘭察請遣回怯卒毋使搖亂新兵上從其請尋詢知阿桂方駐軍當噶爾拉乃分兵千人令額森特自南山往迎又令普爾普將三百人巡鄂克什諸隘口七月賊大至美諾明郭宗俱失守海蘭察退保日隆上責其不能禦賊命阿桂按治阿桂至日隆奏海蘭察當兵潰時前後圍截未與懦卒同潰惟平日不能申明軍律咎不能辭命左授領隊大臣停俸十月命以阿桂爲定西將軍謀再舉海蘭察偕領隊常清等將八千人自達木巴宗北山取道分三路進奪別斯滿大小十餘寨復與富興等攻取帛噶爾角克底木達

布朗郭宗諸寨師復克美諾上嘉海蘭察奮勉命支俸三十九年正月阿桂令海蘭察將五千人自明郭宗進谷噶山擊賊又令與保甯將二千人自喇穆喇穆橫梁繞八十餘里攻登古山登古山在諸山最峻羅博瓦山與對峙亦賊中奇險處二月令普爾普順山梁進海蘭察山山後自石罅躍登搏賊酣戰額森特保等至合力擊賊賊少却復分隊冒死衝突射之殪數十人餘賊負矢遁乃還取羅博瓦前山攻第三第四峯而額森特攻第二峯普爾普攻第一峯俱克之上諭羅博瓦爲賊險要門戶海蘭察力攻功最授內大臣三月從第四峯下進攻得斯東寨克之四月賊乘霧雨於山坡立兩碉海蘭察率兵毀之五月於喇穆喇穆山後築柵賊屢自林中來犯與額森特合擊賊披靡走六月攻色溯普岡賊設大碉六互相應額森特克左兩碉烏什哈達克右一碉海蘭察獨克中三碉及附近卡寨七月抵色溯普南崖石壁陡滑督兵手足攀援上殲東西峯守碉賊殆盡又自喇穆喇穆山麓乘勝攻日則了口取碉卡百餘賊堅守該布達什諾木城師循山溝海蘭察出其左額森特出其右官達色出中路三道

並進遂逼遜克爾宗上嘉海蘭察爲諸將倡屢克險要賜號綽爾和羅科巴圖魯並賚白金三百八月借額森特自遜克爾宗峯脊分左右翼仰攻登碕頂縱火燬碕卡二百餘又旁出遜克爾宗西逼賊寨督兵踴躍進賊穴地匿不敢出九月取遜克爾宗水碕斷賊汲道乘勝攻官寨賊鎗石如雨督兵奮進額森特取其右第一寨海蘭察左頰傷裹創力戰克第二寨軍中目賊渠所居大寨爲官寨亦曰正寨示與他碕卞別也上以海蘭察傷甫平卽督兵攻奪堅碕手敕嘉獎十月克默格爾山梁及密拉噶拉木得大寨一石碕四山後凱立葉官寨亦下復授參贊大臣又自默格爾西進攻布拉克森及格思巴爾焚寨落數百於是凱立葉附近碕卡皆盡命在御前侍衛上行走十一月夜度山溝進格魯克古了口岸礮壁立督兵揉登天明登者六百人賊并力拒奪二碕循山梁下攻桑噶斯瑪特別遣兵自陡烏當噶山進克沙木拉渠什爾德諸寨復督兵攻克革什戎岡及作固頂賊寨橫越諸山下溝上梁鼓勇徑度盡克諸碕寨與丹壩軍合十二月抵桑噶斯瑪特山賊於碕外設木城爲護師自柵隙發矢或拔

柵木撞之城立毀四十年正月自康薩爾分路進剿據山溝碉寨二月克甲爾納沿河諸寨進攻勒爾吉博寨海蘭察克山麓碉二賊自噶爾丹寺來援擊敗之四月將軍阿桂令往宜喜會明亮調兵入道約期合攻上賜緞二端尋分兵千人偕福康安赴宜喜先取甲索賊碉進攻得楞山岡皆下焚薩克薩谷大小寨落數百西北兩路兵合五月攻上下巴木通大碉並克色爾外安吉達佳布諸寨焚噶爾丹寺六月自榮噶爾博山梁攻巴古寨落賊恃險拒攻未下紆道繞舍圖枉卡以入海蘭察督兵進據昆色爾山梁克果克多碉進至拉枯喇嘛寺再進經苗則大海又攻章噶上下十餘寨盡克之合諸路兵逼勒烏圖海蘭察自托古魯踰溝直上山梁八月取隆斯得寨三分地設伏遂克勒烏圖九月整軍進攻噶拉依初自達思里正路入慮賊防密改自達烏達圍進海蘭察繞至莫魯古上連奪噶克底綽爾丹諸寨又克西里山梁並科布曲諸碉十月攻達噶自中路入分兵張兩翼出旁徑克兩堅碉下攻雅瑪朋寨閏十月據黃草坪築柵斷賊援賊起木城海蘭察督兵陟山自上壓下克之十一月分道攻奔

布魯木夜迫山下焚賊木城遂據西里正寨又克舍勒固和魯寨四進攻雅瑪朋正寨從中路設伏偕普爾普等盡克附近寨落十二月克勒隈勒木通石碉築柵至科布曲海蘭察冒鎗石進乘勝克索隆古得木巴爾們都斯諸寨賊又於布哈爾下積木設伏拒師海蘭察分兵三道並進立時攻破遂取奇石磯又遣兵悉收庫爾納額木里多諸寨及巴斯科官寨四十一年正月克舍齊雍中兩寺海蘭察屯兵噶拉依河岸扼要隘尋偕福康安普爾普等截噶拉依右路克大石卡移轍進擊扎木什克寨二月大金川曾索諾木就縛金川平封海蘭察一等超勇侯賜雙眼花翎師還郊勞賜御用鞍轡馬一飲至賜緞二十端白金千圓形紫光閣列前五十功臣授領侍衛內大臣補公中佐領四十六年三月甘肅撤拉爾回蘇四十五爭立新教爲亂破河州據華林山命大學士阿桂視師疏請以海蘭察自佐上已命爲領隊馳驛詣軍前四月抵蘭州督兵攻龍尾山賊伏穴中守阿桂至令海蘭察盡護諸軍五月偕明亮額森特等分左右翼陟山殺賊復踰水磨溝猝上華林山賊駭傾穴出師隔退賊來逐還兵擊之

殲賊甚衆賊被創鉅望見海蘭察乘馬出陣輒先驚竄閏五月將阿拉山馬兵繞出華林山江南潛伏候賊至突出濠殺賊又督屯練兵取賊卡四步戰中鎗傷上閱其勞諭阿桂撫慰賊據大卡負嵎海蘭察單騎至五泉山審度還向華林山暫伏濠中調賊還急起猛攻遂克之入賊營焚所居板屋賊退保華林寺督兵逼寺立柵殲賊衆敵渠傳示各回民賊平上諭獎海蘭察功官其子安祿三等侍衛四十九年四月甘肅回復私起新教聚衆滋事命尙書福康安視師授海蘭察參贊大臣賊屯靜甯底店海蘭察督巴圖魯侍衛等進逼賊巢設伏痛殲之遂破石峯堡禽賊渠張文慶等擢安祿二等侍衛予騎都尉世職五十二年蘇州林爽文爲亂命將軍福康安視師仍授海蘭察參贊大臣十月渡鹿仔港登岸後三日率巴圖魯二十人至彰化八卦山察地勢賊方於山上築卡海蘭察躍馬登賊擁至發箭殲數賊餘驚遁上以其能用少擊足諭獎之十一月自笨港開道同福康安援嘉義分隊五沿途搜勦自崙仔頂崙仔尾逼至牛稠山賊萬餘阻溪守海蘭察越溪徑上山聚攻克賊柵賊遁追至大排竹盡焚

賊寮嘉義圍解上嘉海蘭察身先士卒勇略過人進二等超勇公賜紅寶石頂
四團龍補褂十二月勦城西大崙莊及海岸賊又焚城東興化店員林賊莊督
兵直勦北路時賊屯中林尤剽悍海蘭察冒鎗石馳剿克之大埔林大埔尾諸
莊賊俱潰收斗六門抵水沙連賊已遁尋蹤搜捕見賊渠方乘馬執轡射墜馬
獲以歸進攻大里杙林爽文起事地也殲賊目數十賊黨二百林爽文逃入番
社卽自內山平砦仔逐賊至集集埔賊砦前阻大溪海蘭察策馬逕渡盡殲砦
中賊追十餘里至浩淮角焚草寮千進勦小半天山寨海蘭察徧歷東勢角山
峯獅子頭打鐵婆蝦骨合歡諸社至極北炭窰捕治餘賊五十三年正月得爽
文於老衢崎檻送京師上念海蘭察功解佩囊賜之二月還兵至南路自彎裏
社至極南邨橋執賊渠莊大田磔於市臺灣平賜紫帽金黃辮珊瑚朝珠再圖
形紫光閣五十六年廓爾喀侵後藏仍以福康安爲將軍海蘭察爲參贊大臣
率巴圖魯侍衛及索倫兵千人往討出西寧明年三月抵後藏閏四月抵第哩
浪古與福康安分往絨轄斯拉木察地勢定策自濟噶進兵海蘭察偕阿滿泰

出中路賊兩礮前後相輔師奪前礮賊守後礮不出督兵毀旁垣入短兵接殺賊目三賊兵二百進屯擦木乘勝克瑪噶爾轄爾甲山梁賊渠率衆陟山我兵暫伏賊至山半橫擊之賊且戰且退海蘭察疾馳下擊賊斬賊渠七賊二百餘俘三十海蘭察馬足中鎗上聞戒以接仗時宜持重毋輕冒險師進攻濟噶官寨海蘭察與台斐英阿督索倫兵往來衝擊自丑至亥克之斬賊六百俘二百自濟噶進至索喇拉山山下有石卡師直攻之賊棄卡奔逐至熱索橋賊撤橋攻之不及海蘭察密令阿滿泰等東越峨綠山自上流潛渡賊駭奔墜河者甚衆師悉渡遂據熱索橋進至密哩頂越崇山數重抵旺噶爾深入八百七十里不見賊旺噶爾西南有大川橫亘北曰旺堆南曰協布魯迤東爲克堆寨賊各築卡以守師至旺堆賊扼河抵禦不得渡乃留兵牽賊密從上游縛木以濟出賊不意直薄克堆寨大敗之六月督兵自協布魯進由噶多東南越雅爾賽拉山晝夜行至博爾東拉前山賊築木城三石卡七據要隘乃轉從山巔下臨賊卡與阿滿泰上下夾擊諸城卡盡下乘勝逐賊至瑪木拉殺伏賊百餘人師屯

雍雅山廓爾喀乞降拒不許七月進攻噶勒拉山三道皆勝逐賊至堆補木山奪其卡山下爲帕朗古橫河賊扼橋以拒官兵奪橋渡馳上甲爾古拉山別兵從上游潛渡抵集木集山合軍賊來侵往來迎擊戰兩日夜越大山二克木城四大小石卡十一戮賊目十三斃賊六百俘十七廓爾喀渠畏懼力請降詔許之進海蘭察一等公五十八年三月卒諡武壯復圖形紫光閣甫成上製贊嗟惜諭曰海蘭察以病卒例不入昭忠祠念其在軍奮勉嘗受多傷加恩入祀子安祿襲公爵授頭等侍衛嘉慶四年佐經略勒保征四川教匪戰屢有功賊渠苟文明等窺開縣安祿與總兵朱射斗合軍逐勦賊不敢東竄十一月與射斗逐賊枯草坪乘雨登汪家山殺賊賊多墜崖死安祿望見數十賊匿山溝率數騎逐之賊潰散獨策馬從其後數賊自林中出安祿倉卒中矛死諡壯毅賜白金千治喪加騎都尉世職合前賜騎都尉爲三等輕車騎尉是時奎林子惠倫亦戰沒上以二人皆名將子與烏合亂民戰沒於行陳深致惜焉

奎林字直方富察氏滿洲鑲黃旗人承恩公傳文子也自拜唐阿襲雲騎尉擢

雲麾使襲承恩公爵授御前侍衛累遷鑲白旗護軍統領管理健銳營三十七年授領隊大臣從副將軍阿桂征金川與侍衛和隆武攻納蘭山梁攻當噶爾拉木果木師潰命阿桂爲定西將軍召奎林入咨軍事旋命佐副將軍明亮出南路自墨壘溝進攻得里賊築碉山嶺奎林率兵晝伏夜行至其側突擊破之攻拉約夜渡河鼓譟克賊壘遂抵僧格宗連破石碉獲軍糧火藥時阿桂復美諾明亮遣奎林往會師復從明亮攻斯第奎林率第一隊兵先占班得古水泉與賊持兩晝夜涉險鏖戰飛石傷脊兩賊握利刃突前侍衛珠勒格德射之殪餘賊驚逸上諭嘉奎林勇猛攻達爾圖賊碉綿亘數里奎林冒雨先登立拔第一碉官軍乘勢疾擊克碉十五俘賊目八獲糧械無算復自木克什山梁進克賊碉一中鎗傷頂上諭曰奎林平日戰甚力今頂傷中要害時富德軍於馬爾那令奎林代防卽以富德佐明亮擊賊旋授鑲紅旗漢軍都統傷愈復從明亮攻宜喜阿桂遣領侍衛內大臣海蘭察會奎林度地勢約兩軍隔河夾擊直擣勒烏圍勒烏圍噶拉依兩金川渠所居地也奎林分攻甲索又自薩克薩谷攻

得楞賊棄碉竄乘勝追躡墮崖死者相枕籍攻基木斯丹富噶奪碉二十六又
奪茹寨麥田十餘里賜瑚武巴圖魯名號復趨噶西喇嘛寺拔沙爾尼溝碉卡
阿桂破勒烏圍奎林偕明亮和隆武等攻扎烏古山未克請益兵上諭奎林和
隆武毋以勇往好勝愧激輕進雖云不入虎穴焉得虎子亦當審度機要權利
害而行不可冒昧自旋什扎古進兵偕和隆武自山溝潛行登其巔碉內賊無
一脫者上諭明亮奎林和隆武宜黽勉立勳毋讓西路專美但當度利害不可
但知輕進進克扎烏古山梁再進據納木迪斯底葉安奪三十餘寨又自耳得
谷下擊碉賊卡斃賊百餘復自礮占進攻達撒谷拔碉卡三十斃賊百趨獨古
木思得賊潰平山上下八十餘寨師經乃當降其渠攻甲維俘賊酋降其衆千
餘克卡拉爾抵舍斯滿賊出降奎林繞山巔行三百里至底角河沿撫定寨落
數百遂與阿桂軍合圍噶拉依上加奎林一等男命其子崇倫承襲並賜雙眼
花翎遂俘金川酋索諾木師還凱旋上郊勞賜文綺十二銀五百御用鞍轡馬
一圓形紫光閣列前五十功臣授右翼前鋒統領擢理藩院尙書四十五年出

爲烏魯木齊都統驍騎校常福杖斃披甲多羅奎林論劾上以多羅不孝罪當死責奎林誤劾改授烏里雅蘇臺將軍坐在烏魯木齊失察各州縣浮報糧值命以公爵畀其叔傅玉承襲復授烏魯木齊都統遷伊犁將軍奎林貴戚有軍功嗜酒躁急五十二年參贊海祿疏劾上命烏魯木齊都統永鐸勘奏逮至京師命諸皇子軍機大臣會刑部按治獄成奎林坐擅殺罪人擬杖海祿所劾不盡實亦有罪坐誣告死罪未決擬流帝以奎林孝賢皇后姪而海祿所論劾不盡虛擬罪乃反重失平命俱奪職在上虞備用處拜唐阿上効力旋授奎林藍翎侍衛再遷臺灣鎮總兵時林爽文亂甫平多盜爲民害上欲嚴懲之諭奎林勿拘泥勿姑息有犯必懲奎林屢捕治劇盜復論誅裨將坐贓及營兵之爲盜者稱上旨加提督銜五十六年擢福建水師提督師征廓爾喀改授成都將軍參贊大臣帥師入藏五十七年行至江卡疽發於頂遂卒諡武毅珠勒格德鈕祜祿氏滿洲正白旗人以三等侍衛從軍其救奎林也上命擢一等侍衛賜號扎克博巴圖魯戰於木克什據水卡斷賊汲道設伏以待賊乘霧分道來犯守

調兵禦之伏起賊復自山下援珠勒格德突入陣刃三人大敗之遂克木克什山下礮復與都統和隆武等襲取日旁山後礮十餘日旁近勒烏圖賊礮寨相望後路必爭地也授正紅旗蒙古副都統奎林攻什扎古珠勒格德與和隆武設伏琅谷奎林兵至夾擊破木城進攻扎烏古克賊礮四卡八自日新滿至巴扎木賊礮林立珠勒格德與和隆武分兵進連克賊礮十七金川平圖形紫光閣御製贊猶及救奎林事尋卒

和隆武馬佳氏滿洲正黃旗人甯夏將軍和起子也初隸鑲藍旗以和隆武功高宗命以本佐領擢入正黃旗凡擢旗或以功或以恩或以佐領或以族或以支皆出特命和隆武襲一等子爵授三等侍衛三十七年從護軍統領明亮征金川自墨壑溝攻甲爾木山梁師分道而進和隆武爲領隊侍衛明亮攻美諾喇嘛寺和隆武傍水夾攻賊潰而復聚盡殲之夜克美諾諸礮寨復分攻納圖正面山梁敗賊於鳩寨奪礮五十餘邊鑲藍旗蒙古副都統旋收僧克宗從富德攻克絨布寨北沃什山摩格孟格里格穆圖德宗進攻卡角從奎林第取斯

第賊迎戰和隆武磨衆潰決矢盡以矛鬥被創賜玉搬指荷包進攻克木什克
第一碉賜黃馬褂師攻日旁和隆武自周叟繞出其後突入碉賊驚潰槍石不
及施短刀相搏循山逐賊碉十餘墮二百餘日旁賊殲焉復偕珠勒格德攻谷
爾堤諸地碉寨盡克之上屢詔嘉獎授正藍旗蒙古都統進攻得楞以南碉卡
又進攻勒爾替山梁殺賊甚衆石據頭眞噶和隆武與奎林乘勝運轍軍甚囂
分隊突出攻據之賊奔潰四十年七月阿桂師逼勒烏圍而和隆武與明亮奎
林合軍出北路自扎烏古山進語已具奎林傳四十一年金川平進和隆武三
等果勇侯賜雙眼花翎師還賜御用鞍轡一馬並寶銀幣圖形紫光閣列前五
十功臣出爲寧夏將軍移吉林將軍卒諡壯毅

額森特台褚勒氏滿州正白旗人以前鋒馬甲從征伊犁右部哈薩克與塔什
罕相攻參贊大臣富德使額森特諭哈薩克內附使入覲額森特護至京師擢
藍翎侍衛遷二等侍衛乾隆三十四年從經略大學士傅恒征緬甸攻老官屯
賊出戰額森特率索倫兵擊敗之三十六年從定邊右副將軍溫福征小金川

攻巴朗拉奪其東山峯毀碉賜號丹巴巴圖魯師取達木巴宗額森特由別道
出山北連破碉卡至資哩合師奪北山賊乘夜築卡將兵邀擊賊數百踵至三
卻三進額森特中鎗力擊敗之遂克資哩復策取普爾瑪寨攻東瑪連戰敗賊
掘頭等侍衛賊分兩道出戰伏兵逆擊賊大敗薄其碉身被創大呼殺賊遂克
東瑪進克美美卡拔路頂宗山碉授鑲黃旗蒙古副都統至博爾根奪山巔大
寨夜渡水仰攻納拉覺山克碉十二卡十五擊格實迪破公雅山踰木爾古山
麓取溝內寨卡據嘉巴山授領隊大臣小金川平復從將軍溫福至功噶爾拉
山功噶爾拉者兩金川接壤要隘也峯陡絕積雪封徑賊踞阨險額森特督兵
直上副都統烏什哈達繼之漸克旁碉戰于固木卜爾山敗賊從溫福移營木
果木會攻昔嶺賊碉密布與海蘭察合攻冰雪中相持數十日木果木軍潰副
將軍阿桂在當噶爾拉全師撤駐翁古爾壘上命阿桂爲定邊將軍再進額森
特與總兵海祿奪北山橋卡總兵成德至三路合攻阿喀木雅山乘勝取木蘭
壩平鄂克什官寨師至路頂宗額森特越山攀蹠躍入刃賊數十墮崖死進攻

郭明宗遂復美諾授正紅旗護軍統領賜御用黑狐冠偕海蘭察至谷噶山下有橫梁曰喇穆峯勢峻險海蘭察與侍衛公保甯從旁進額森特當其前夜乘雪影穿箐越險直前奮擊轉戰至黎明已二十餘里始見高峰列大礮九線石牆俄雪又作乘晦抵礮趾賊不敢出乃攻取其左右山梁及附近償巴拉克山峯夜擊梁東色依谷山與海蘭察兵合海蘭察據登古山與羅博瓦山相對險特甚共率兵由石罅躍登林中礮石如雨及第三峰麓賊數百分隊迎擊卒敗之攻克第二峰礮上焚其舊勉授散秩大臣進勦得斯東寨斫寨門縱火賊出殺之雪夜賊劫副將常祿保營額森特聞鎗聲赴援賊敗走賊乘雨霧建二礮於羅博瓦山額森特與海蘭察率兵八百夜雨中薄礮毀牆入賊窟竄平其礮賊夜劫烏什哈達營追擊敗之賊於羅博瓦峰下色溯普大岡置大礮六左右相應援海蘭察克其中三礮額森特克其左二烏什哈達克其右一山砦皆平上嘉之製詩紀事額森特於大雨中攻色溯普左偏砍柵進克二木城遙見該布達什諾各砦烟起知海蘭察兵至遂乘機奪筆郎納克該筆達烏諸砦改墨

爾根巴圖魯賜白金二百師圍遜克爾宗額森特與海蘭察燬平房碉卡二百餘克水調攻官寨自葦木中聯逼寨塼賊死戰額森特傷鼻及足撲第三寨賊舉鎗折其弓鎗傷指易弓連斃數賊上以額森特被傷能易弓射賊手詔嘉獎賜貂冠捨翎繇掛攻默格爾山與海蘭察共攻克密拉噶拉木碉及凱立葉官寨敗勒烏圍援賊馘百餘授參贊大臣乘勝取布拉克森及格斯巴爾二山燬山下羅卜克鄂博溝口七碉於是凱立葉上下及附進寨落皆平上獎其奮勉超羣命在乾清門行走復與海蘭察分隊乘月黑度山溝入格普古了口得碉卡十二抵桑噶斯瑪特破石城木柵奪撫庸羣尼二寨攻上下巴木通克之下寨落百餘賊不敢復拒至直古腦山頂與福康安兵合直趨勒烏圍賊集賊負高阻深力戰克之額森特負傷不能乘馬上命駐守勒烏圍額森特隔河見明亮兵攻阿爾古發礮助之上聞曰額森特不分畛域無愧爲參贊額森特望見攻西里官兵得捷率保甯常祿保等攻西里山麓克其木城勒烏圍前山曰克爾古什拉斯者取噶拉依正道也賊於山上城礮密布額森特攻克之乘勝取

格隆古師將逼賊巢賊恃布哈爾則朗噶克爲門戶斫木塞道額森特率諸將烏爾納那木扎彰鼐等進攻賊伏積木中發鎗如雨額森特乘柵以登設伏兵夾擊賊遂驚潰進克喀爾巴山後燬附近寨落遂薄噶拉依上嘉額森特勇封一等嫺勇男世襲金川平賜御用鞍馬緞二十端白金千圓形紫光閣列前五十功臣四十六年循化回蘇四十三因爭立新教爲亂破河州命從大學士阿桂討之額森特與海蘭察明亮等分攻華林山力戰被傷賊平進三等子四十七年卒

普爾普額爾特肯氏蒙古正黃旗人父巴圖濟爾噶爾本額魯特杜爾伯特部宰桑來降隸蒙古正黃旗從征準噶爾討霍集占皆有功官至內大臣賜騎都尉世職圖形紫光閣普爾普自閑散再遷三等侍衛從征緬甸擢御前侍衛授公中佐領乾隆三十七年命率額魯特兵詣金川從定邊右將軍溫福進討師攻達克蘇普爾普奪賊卡斷賊來路從參贊大臣豐昇額攻明郭宗命爲領隊侍衛偕巴雅爾取明郭宗南寨加副都統銜進攻噶爾拉經了口盡得賊卡寨

偕副都統海蘭察攻昔嶺克要路碉二普爾普與海蘭察額森特巴雅爾烏什
哈達馬全阿爾納素戰尤力復與諸將攻斯達克拉阿噶爾布里碩藏噶爾山
梁克之進攻色布色爾山梁得賊碉十餘羅博瓦者金川渠所恃爲門戶者也
師進悉據其諸峯投散秩大臣賊刦副將常祿保援擊敗之與海蘭察合攻喇
穆喇穆射殺紅衣賊渠又拔該布達什諾木城二賜御用黑狐冠賊劫我軍所
置卡與烏什哈達赴援賊潰攻遜克爾宗中創復攻舍圖旺斷遜克爾宗去路
偕台斐英阿等攻章噶得賊寨二十餘又克隆斯得寨賊貯鉛丸火藥處也遂
偕台斐英阿等克勒烏圍賜什勒堪咳巴圖魯名號進攻阿穰曲強達巴克大
碉三木城四仰攻西里山峰賊越碉竄普爾普逐捕所殺傷過當攻舍勒固租
魯得碉一攻開布智章得寨一又克薩爾歪阿結占賊寨據勒隈勒木通科布
曲山梁斬獲甚衆四十一年正月合諸軍圍噶拉依普爾普出其右與海蘭察
築壘逼賊巢遂克之金川平封三等奮勇男世襲圖形紫光閣列前五十功臣
師還上郊勞賜御用鞍轡馬一授正紅旗護軍統領正白旗滿洲副都統賜雙

眼花翎四十三年恩蹕謁泰東陵離管住宿坐奪雙眼花翎林爽文之亂授領隊大臣命從將軍福康安赴台灣援嘉義解圍克大里杙爽文逃小半天山頂同海蘭察進攻賊拒戰山路險惡普爾普率廣東兵及屯練降番擊木柵先登賊潰遂擒爽文進軍瑯嶠追勦賊目莊大田賊來劫營普爾普於大武壠隘口衝殺敗之諭於臺灣嘉義建生祠事見福康安傳大田就擒臺灣平再圖形紫光閣晉封二等男襲一次以三等男世襲五十五年卒

論曰海蘭察勇而有智略每戰微服策馬觀敵察其瑕集兵攻之輒勝平生惟服阿桂知兵福康安禮先焉乃爲盡力師所向有功奎林亦孝賢皇后諸姪剛而不撓動名與羣從並和隆武額森特普爾普皆以克敵功最受封爵乾隆中多將材此尤其魁傑也

清史稿

列傳一百十九

富勒渾

字 魁

劉秉恬

字 子 和

鄂寶

字 希 傑

徐績

覺羅圖思德

字 寶 賈

陳步瀛

徐嗣曾

孫永清

郭世勳

畢沅

富勒渾章佳氏初自舉人授內閣中書累遷戶部郎中乾隆二十八年授山西冀甯道遷山東按察使以在冀甯道失察陽曲知縣段成功虧帑左授山西雁平道再遷浙江布政使三十五年署巡撫奏勅總督崔應階僕誣指錢塘民爲賊擅刑致斃論罪如律三十七年調陝西尋擢湖廣總督入覲賜孔雀翎四川總督阿爾泰坐貪黷玩縱得罪上命富勒渾如四川會總督文綬按治阿爾泰縱子明德布與布政使劉益相結受賄明德布在京師上令軍機大臣傳訊自承富勒渾奏論益立斬上以爲過重改監候獄連署布政使李本富勒渾奏本

罪當奪職枷示不足蔽辜請留軍効力上責其名重實寬意存取巧命枷示期滿留軍効力三十八年師征金川四川總督劉秉恬出駐美諾命富勒渾留署四川總督總理各路軍需秉恬奏揀發往川省各員視軍營爲畏途惟恐出口辦差不通聞問上以責富勒渾富勒渾奏陳司道公議新到各員出口辦差未免竭蹶請以現任各員調赴而令新到者分別署理上責富勒渾玩公沽譽令効倡議者富勒渾奏司道公議並無倡始上益不懌謂富勒渾竟敢以罰不及衆嚇朕下吏部奪官命寬之木果木師潰底木達被陷富勒渾率新至貴州兵馳赴蒙固橋防守事聞上嘉之旋奪秉恬官卽以富勒渾實授令駐美諾以欽差大臣關防督餉時美諾亦被陷富勒渾屯明郭宗河口據山梁設卡防守復發兵分駐路頂宗巴朗拉將軍阿桂進攻小金川上命富勒渾與提督王進泰統兵策應師克美諾上令富勒渾進泰嚴守美諾並分兵駐僧格宗明郭宗阿桂奏富勒渾王進泰過愼而慮於山川形勢行軍機要均未能悉請令副都統成果雲南提督常青駐守後路上從之諭戒富勒渾等勿存畛域奏新開楸底

至色利溝運道軍糧歸此路運送瑪爾當明郭宗諸地存米借防兵一月糧餘俱運軍前請撤前設臺站又奏分兵駐防大板昭及梭格泊古諸地四十年奏阿桂等督兵進搗賊巢應用糧餉軍火銅片礮料儲備充裕並造皮船濟師又奏調梭格泊古瑪爾當兵分防沙壩三松坪以護驛道皆稱旨上命富勒渾駐布朗郭宗富勒渾奏阿桂明亮合攻甲索山梁布朗郭宗距軍五百餘里慮難於策應上諭曰阿桂進攻勒烏圍自應隨軍督餉兵事移步換形不必泥前旨也師克勒烏圍奏請撤前設卓克采一路臺站四十一年復授湖廣總督命師還上官金川平議叙四十二年授禮部尚書四十三年調工部授鑲藍旗蒙古都統四十四年復授湖廣總督四十五年調閩浙上南巡迎謁時李侍堯以貪縱得罪富勒渾入對上諭及之富勒渾對侍堯實心體國爲督撫中所罕見及上命各督撫議罪又請行誅上責其前後歧異浙江巡撫王亶望丁憂留辦塘工攜家居杭州亶望得罪上又責富勒渾未劾大學士阿桂赴浙江閱海塘疏劾杭嘉湖道王燧又責富勒渾徇庇奪孔雀翎降三品頂帶授河南巡撫河溢

萬錦灘富勒渾親赴防護又溢青龍岡四十七年工竟還現任頂帶復授閩浙總督臺灣漳泉民械鬪劾總兵金蟾桂知府蘇泰等並奪官五十年三月入京與千叟宴調兩廣粵海關監督穆騰額入覲上詢富勒渾操守對未敢深信及命軍機大臣詰之又發富勒渾縱僕殷士俊納賄狀下巡撫孫士毅按治士俊常熟人並令江蘇織造四德等藉其家資累萬士毅奏亦發富勒渾與士俊等關通納賄事實上奪富勒渾官遣尙書舒常如廣東會訊大學士阿桂方按事浙江又命士毅逮富勒渾監送阿桂鞫治論斬下刑部獄五十二年詔釋之五十三年坐在閩浙失察總兵柴大紀貪劣復下刑部論絞仍釋之五十四年羅源盜發上追諭富勒渾廢弛玩誤成伊犁五十五年釋回六十一年又發熱河是年卽釋回卒文綬富察氏滿洲鑲白旗人雍正十三年自監生授內閣中書再遷禮部員外郎改內閣侍讀乾隆十一年授甘肅涼州知府累遷轉山西布政使三十一年坐迎合巡撫和其衷徇陽曲知縣段成功虧帑奪官戍軍臺旋授道銜往哈密辦事三十三年授河南巡撫未上官調陝西三十六年署陝西

總督士爾扈特內附命赴齊齊哈爾犒勞授四川總督未行仍調授陝甘師征金川奏陝甘發兵三千延綏鎮總兵書明阿以千人赴維州興漢總兵張大經以二千人入四川從征文綏如鞏昌安定視師行三十七年疏言巴里坤烏魯木齊年來日繁盛招民墾地戶給三十畝並農具籽種視新疆例六年陞科瑪納斯城南可二萬餘畝瑚圖壁城西北可六千餘畝巴里坤城外及傍近諸地五千九百餘畝玉門酒泉敦煌三縣可五千餘畝往時嘉峪關恒閉過者候譏察今關外已同內地請令辰開酉閉兼開烏魯木齊城南七達色巴山梁以利行旅又酌定收指監糧籌備巴里坤移駐滿洲兵糧料並於巴里坤山灣設廠牧羊令滿洲兵子弟取乳剪毛以廣生計均如所請行三十七年調四川總督前政阿爾泰坐誤軍興又縱其子明德布婪索得罪上命文綏察明德布婪索狀文綏言明德布侍阿爾泰日久與屬吏往還尙無婪索事而明德布在京師上命軍機大臣按鞠具服乃責文綏袒護奪官往伊犁効力三十八年木果木師潰總督富勒渾奏報金川酋攻明郭宗河口上授文綏頭等待衛佐富勒渾

治軍未幾授湖廣總督仍署四川總督借富勒渾奏言增兵需餉請令商民願自湖廣運糧入四川者視乾隆十三年范毓緒助餉加銜例穀一石當銀九錢授以貢監職銜並議行四十一年實授四十四年入覲子國泰官山東巡撫召詣京師相見四十五年疏言雲南昭通東川諸屬改食川鹽應於川滇交界隘口設稽察上可其奏並諭雲貴總督福康安一律嚴防四十六年詔停打箭爐收稅部員由總督委員管理因條奏裁改諸事從之四川多盜民間號囑噶子闌入鄰近諸省湖廣總督舒常湖南巡撫劉墉貴州巡撫李本先後疏言盜自四川入境遣將吏捕治文綬奏後入上責其玩縱降三品頂帶尙書周煌復陳盜爲民害將吏置不問甚或州縣吏胥身爲盜擾民上以文綬因循貽患奪官往伊犁效力四十八年釋回四十九年卒子國泰自有傳

劉秉恬字德引山西洪洞人乾隆二十一年舉人二十六年明通榜授內閣中書充軍機處章京再遷郎中三十二年考選福建道御史轉吏科給事中大學士傳恆督師討緬甸以秉恬從擢鴻臚寺少卿師還超擢左副都御史遷刑部

侍郎調工部再調倉場三十七年師征金川大學士溫福出西路總督桂林出南路授秉恬欽差大臣督西路糧運尋以南路徑僻站長輓運尤艱命改赴南路秉恬以西路需餽急請暫留料理上聽之又奏南路運糧人俱畏其難臣非敢言易然天下無必不可辦之事上諭令勉爲之尋奏師自甲爾木進攻小金川道路險阻唯羊可陟乃招蠻民販羊至軍以六羊當米一石又奏師攻克僧格宗距達烏圖六十餘里臣往勘擬於策爾丹色木設站其地有喇嘛寺糧至卽貯寺以蔽風雨旋赴美諾督運上嘉秉恬不辭勞瘁賜孔雀翎授四川總督仍留美諾督運三十八年師克小金川溫福督兵進攻昔嶺上命秉恬將美以溝曾頭溝兩路酌量形勢分別駐守赴木果木及功噶爾拉兩地察勘秉恬奏至與上諭正合深嘉之諭謂勤勞軍務與統兵督戰無異命交部照軍功議叙秉恬途中得綽斯甲布土司遣頭人投稟許綽斯甲布與金川親睦雖從征未嘗盡力並請歸金川所侵噶爾瑪六宗諸地秉恬諭師討金川斷不中止噶爾瑪六宗諸地事平後當有公斷爾土司從征未得一地且縱金川人在境內爲

盜所謂盡力者安在頭人語塞奉檄而去疏聞上嘉秉恬甚合機宜秉恬至木果木復奏臣自崇德抵功噶爾拉地氣極寒四山皆雪甫經設站以篋席支棚使人畜暫有棲止至簇拉角克爲布朗郭宗運糧要道兩口東西相距六十七里開修土路通至木波卽合帛噶爾角克岡及布朗郭宗大道又自功噶爾拉至木果木路陡雪滑已飭修路鑿冰不致少誤糧道報聞加太子少保木果木師潰以提督董天弼失守底木達布朗郭宗責秉恬不先奏劾奪官予按察使銜留軍旋并削銜命佐按察使郝碩督西路運糧三十九年奏劄視米易取糧已由四川採辦十數萬斤又奏修整樹坻至司爾拉薩拉驛道並與總督富勒渾議以北路軍餉歸西路遞運上並嘉納四十年以督運無誤授兵部郎中仍賜孔雀翎以欽差關防督餉未幾擢吏部侍郎以母病召還京師旋丁憂未幾起署陝西巡撫四十五年召入覲調署雲南巡撫四十六年署雲貴總督安南國王以內地人民出邊居住曾制土民欠稅且動稱內地差委徵索租賦大爲民擾咨請防禁秉恬擬照會略謂內地百姓緣爾國需用貨物特准開關通市

爲爾國利賴本非在外墾田種地無應納租賦焉有曾制土民欠稅之理如滋生事端惟有責令爾國察出送回內地究治奏聞上嘉其得體仍令軍機大臣刪改寄秉恬具答累年以運銅妥速議叙五十一年召授兵部侍郎五十二年調倉場嘉慶四年復調兵部五年卒查禮字恂叔順天宛平人少劬學乾隆元年應博學鴻詞科報罷入資授戶部主事揀發廣西補慶遠同知舉卓異上命督撫舉堪任知府者巡撫定長李錫秦先後以禮薦十八年擢太平知府母憂去服闋補四川甯遠三十三年擢川北道三十四年調松茂道小金川用兵總督阿爾泰檄禮治餽將軍溫福師進巴朗阿大營以禮從令修建汶川桃關索橋逾月工竟上嘉之命專司督運西路糧餽三雜谷土司爲小金川煽惑頗懷疑懼禮諭以利害衆咸服時溫福出雜谷腦道提督董天弼分兵自間道出曾頭溝軍需局以儲米半運雜谷腦曾頭溝軍糧不足禮坐尊官仍留軍效力師克美諾溫福令禮與天弼清察戶口地糧總兵五福自美諾移軍丹壩總督劉秉恬奏禮雖文員頗強幹諳番情命署松茂道代五福駐美諾撫降番三十八

年木果木師潰禮偕遊擊穆克登阿赴援至蒙固橋聞喇嘛寺糧站陷士卒狼顧會松茂總兵福昌至遂復進遇伏禮率督兵擊之擒砮首餘寇驚遁美諾已陷賊阿桂馳援以達圖垂陷檄禮駐守尋命眞除三十九年阿桂師再進令禮專任臥龍關路糧餉阿桂秉上旨以南路陰翳設疑兵牽綴奇兵自北山入禮請自楸坻至薩拉站開日爾拉山山高五十里冰雪六七尺故無行徑禮登高相度以火融積凍鑿石爲磴不匝月通路二百餘里自楸坻達西北兩路軍營視故道皆近十餘站省運費月以鉅萬計特旨嘉獎郭羅克掠蒙古軍牲畜殺青海公里塔爾富勒渾令禮及遊擊翼學聖捕治得盜二還牛馬五百餘盜渠未獲富勒渾以禮行後糧運漸遲誤奏促禮還十一年金川平禮留辦兵屯拊循降番叙功賜孔雀翎上遣理藩院郎中阿林知府倭什布參將李天貴出黃勝關捕郭羅克盜渠未得皆坐奪官仍令禮往捕禮調三雜谷土兵四千先令裹糒疾進禮至宣布上意郭羅克曾瑪克蘇爾袞布來謁問盜渠所在諉不知禮執送內地責其弟索朗勒爾務捕盜四十三年瑪克蘇爾袞布病死上責禮

失撫馭番夷之道四十四年擢按察使瞻對番劫裏塘熱砦麻塘寺禮往按得盜實於法四十五年遷布政使尋擢湖南巡撫入覲四十六年卒於京師子淳大理寺少卿

郭寶謨託氏滿洲鑲黃旗人父西柱官西安將軍郭寶自官學生授內閣中書再遷戶部員外郎乾隆十六年授奉天府尹二十年署廣西巡撫二十六年總督李侍堯劾陸川知縣應斯鳴等縱賊害民郭寶奏前後相歧奪官以三品銜往庫車辦事三十一年召還署左副都御史仍授巡撫歷湖北貴州福建廣西山西諸省內遷刑部侍郎金川用兵三十七年七月命侍郎劉秉恬及郭寶督饒秉恬主西路郭寶及散秩大臣阿爾泰主南路尋令改主西路郭寶議人負米五斗日行一站驟負米石日行可二三站改以騾運軍糈得無闕賜孔雀翎三十八年仍授山西巡撫督饒如故溫福師自功噶爾拉入阿桂自富噶爾拉入豐昇額自綽斯甲布入郭寶駐大板昭主饒溫福軍秉恬駐底木達主饒阿桂軍而豐昇額軍出綽斯甲布南路自打箭爐往秉恬兼任之西路自三雜谷

丹墻往鄂寶兼任之木果木師潰底木達大板昭皆陷賊上命阿桂整兵復進鄂寶仍駐覺木交督餉旋進翁古爾壑疏調副將董果護後路上又命原任江西布政使顏希深馳驛往佐之副將軍明亮等又請令鄂寶駐丹東上念鄂寶兵少命以湖廣續調兵千人屬鄂寶阿桂又疏請桂林率李世傑主南路令鄂寶主西路丹墻至綽斯甲布糧運鄂寶請以丹東屬桂林兼領旋詣丹墻置台站副將軍豐昇額自凱立葉進兵鄂寶請自三雜谷梭磨卓克采轉輸凱立葉較丹墻道爲近豐昇額進攻谷噴鄂寶請自梭落柏古轉輸色木多凱立葉留少兵卽裁站夫省糜費會明亮自宜喜進兵旣克達爾圖兩路軍合師沙墻克勒烏圍鄂寶請將西路台站以次裁撤四十一年金川平軍功加一級七月調湖南巡撫仍留辦軍需奏銷十月授漕運總督四十四年大學士于敏中等議報銷四川軍需不符請令鄂寶等分償得旨豁免四十八年授盛京戶部侍郎兼奉天府府尹五十二年卒子文通官內閣侍讀學士兼公中佐領顏希深字若愚廣東連平州人入資授山西太原同知累遷山東泰安知府建考棚書院

清察徵漕浮收諸弊高宗東巡召對褒以他時可大用二十七年授四川按察使入覲上以希深母老尙欲隨任希深亦不敢奏請改補近地母子知大義命調希深江西二十八年遷福建布政使三十二年調江西丁母憂去三十四年仍授江西布政使又丁父憂去三十八年詣京師命赴金川軍佐鄂寶治餉授河南布政使仍留軍疏言糧台設木池因限於山與軍營相隔將山地開平安營臣與黃巖總兵李時擴督兵防護時令將弁操演不但技藝熟練而槍聲遠近相聞亦可牽綴賊勢又言覺木交深林密箐賊易以藏身臣督兵斬伐林木使附近賊碉有徑可通處絕無遮蔽藉免竊發皆稱旨賜孔雀翎木池站焚燬火藥希深請與時擴分領師深入山重雪積希深摧督拊循恆終夜露宿四十二年擢湖南巡撫旋入爲兵部侍郎四十五年復出署貴州巡撫調雲南卒徐績漢軍正藍旗人乾隆十二年舉人入資授山東兗州泉河通判累遷山東濟東泰武道三十四年擢按察使丁父憂命以按察使銜往哈密辦事賜孔雀翎三十五年擢工部侍郎烏魯木齊辦事大臣三十六年奏瑪納斯在伊犁塔

爾巴哈臺之間請駐兵使聲勢聯絡從之授山東巡撫三十八年上幸天津迎謁賜黃馬褂三十九年壽張民王倫爲亂績率兵捕治次臨清城南爲倫所圍總兵惟一赴援戰敗上遣左都御史阿思哈率兵援績並令大學士舒赫德視師諡曰績爲巡撫地方有此奸民不早覺察不爲無罪但以民亂將巡撫治罪適足長其刁頑事定功過自不能掩尋事定命解任責捕倫餘黨捕得倫弟柱林等二十餘人上嘉績黽勉授河南巡撫仍繳進孔雀翎示儆四十二年奏按察使趙銓健忘上責績於銓應否去留不置一辭下吏議奪官命寬之召授禮部侍郎四十七年坐粵祭禮器誤奪官以三品頂帶往和闐辦事召授正黃旗漢軍副都統遷正紅旗漢軍都統六十年上詢前政弘旰在官事績奏不實奪官以六品頂帶往和闐辦事嘉慶元年授三等侍衛烏什辦事大臣召授大理寺少卿還孔雀翎再遷宗人府府丞十年以病乞休十二年重與鹿鳴宴賜二品銜十六年績子銀授建甯總兵入覲上以績年逾八十調銀直隸正定總兵俾就養卒銀官至直隸提督

覺羅圖思德滿洲鑲黃旗人初自諸生授光祿寺筆帖式累遷戶部員外郎外授江南常鎮道再遷貴州布政使乾隆三十七年擢巡撫疏言貴州威寧瑪姑柞子廠水城福集廠產黑白鉛歲供京局及各省鼓鑄廠員營私滯運請立條款嚴處分並下部議行三十九年署雲貴總督上令出駐永昌並諭以防邊事重視前政彰寶舊日章程益加奮勉抵任後疏言清釐彰寶移交文牘永昌軍需造銷牽混應請各歸各款以清眉目造解京箭各鎮協稱現多損壞與彰寶原奏不符又有批准保山等廳縣添買倉穀亦滋疑義尋劾保山知縣王錫永平知縣沈文亨侵虧倉穀請奪官鞠治上命侍郎袁守侗馳驛往按錫言彰寶勒索供應四萬餘致虧短兵糧上震怒逮彰寶治罪圖思德以箭二十萬解四川軍營上嘉之十一月兼署雲南巡撫自傳恆征緬甸還師緬甸貢使久不至閉關絕市年久圖思德奏言偵知緬民亟盼開關緬酋亦窘迫有投誠意惟風聞難信但當簡練軍實使聞風生畏上聽之及兼署巡撫自永昌還會城令提督錦山等董理邊防疏報佛上意嚴旨促仍赴永昌督辦邊防四十一年復奏

偵知緬酋情狀已死子贅角牙嗣立方幼頭人得魯蘊將遣使叩關納貢上以緬甸初無悔罪輸誠之意諭勿輕聽尋奏得魯蘊遣使投稟願送還內地官人貢象乞開關已飭龍州將吏與以回文上以圖思德示緬甸有遷就結案之意斥爲大謬四十二年又奏得魯蘊欲將所留楊重英蘇爾相多朝相等送還並叩關納貢上念受降事重圖思德不能勝其任命大學士阿桂赴雲南主持調李侍堯雲貴總督圖忠德回貴州巡撫任四十四年擢湖廣總督卒賜祭葬諡恭愍彰寶鄂謨託氏滿洲鑲黃旗人乾隆十三年自繙繹舉人授內閣中書十八年授江蘇淮安海防同知累遷江寧布政使三十年授山西巡撫陽曲知縣段成功虧帑事發具得巡撫和其衷畀銀五百爲彌補及布政使文綬等知情狀奏聞上遣侍郎四達會鞠得實其衷成功論斬文綬等戍軍臺安邑知縣馮兆觀揭河東鹽政達色累商及受贄禮門包又遣四達會鞠並得河東運使吳雲從因被四達糾參嗾兆觀揭發狀達色論死雲從兆觀治罪如律三十二年調江蘇兩淮鹽政尤拔世奏繳本年提引徵銀上以此項歷年均未奏明白乾

隆十一年起應有千餘萬命彰寶會同詳察前任鹽政高恒普福運使盧見曾均坐是得罪又發前任監掣同知楊守英詐取商銀並論如律三十四年命馳驛往雲南省巡撫師征緬甸署雲貴總督命出駐老官屯督餉加太子太保三十五年奏永昌沿邊千餘里山深徑僻應於彝宋關緬箐山隴川龍陵姚關及順寧箐箐橋設卡駐兵上令實力督率又奏貴州調至兵間有老弱現加甄汰上責彰寶現爲總督兩省皆所轄何不劾奏三十七年劾雲南巡撫諾木親才識不能勝任召還又奏車里宣慰土司刀維屏逃匿請裁土缺設專管上從其議定營名曰普安尋寶授雲貴總督三十九年以病請解任王錫事發奪官逮京師論斬四十二年卒於獄

徐嗣曾字宛東實楊氏出爲徐氏後浙江海甯人乾隆二十八年進士授戶部主事再遷郎中四十年授雲南迤東道累遷福建布政使五十年擢巡撫五十二年臺灣民林爽文爲亂調浙江兵經延平吉溪塘兵有溺者嗣曾坐不能督察下吏議亂既定五十三年命赴臺灣勘建城垣因命偕福康安李侍堯按柴

大紀貪劣狀上責嗣曾平日緘默不言尋疏言大紀廢弛行伍貪婪營私事迹昭著又奏撫恤被難流民給銀折米福建舊例石準銀二兩今以米貴請改爲三兩上以福康安奏晴雨及時歲可豐收仍令視舊例借福康安等奏清察積弊籌酌善後諸事均得旨允行嘗以臺灣吏治廢弛不能早行覺察自動上原之命臺灣建福康安海蘭察生祠以嗣曾並列尋奏臺灣海疆刁悍治亂用嚴民爲盜及殺人者役殃民兵冒糧及助戰守義民或挾嫌害良皆立置典刑以是稱上旨嘉嗣曾不負任使事物定命內渡尋又命俟總兵奎林至乃行莊大川者與爽文同亂坐誅嗣曾捕得其子天畏及川事者黃天養送京師又得海盜立誅之五十四年賜孔雀翎大小荷包圖象紫光閣請入覲未行安南阮光平據黎城福康安督兵赴廣西嗣曾著總督福康安瀕行奏福建文武廢弛宜大加懲創上諭嗣曾振刷整頓嗣曾奏許琉球市大黃限三五百斤諭不可因噎廢食又奏福建民多聚族而居有爲盜竇族正舉首教約有方給頂帶盜但附從行劫未殺人拒捕自首擬斬監候三年發遣免死上諭曰捕盜責在將吏

令族正舉首設將吏何川族正皆土豪假以事權將何所不爲福建多盜當賊治若行劫後尙許自首免死何以示儆二條俱屬錯謬五十五年高宗八旬萬壽臺灣生番頭人請赴京祝嘏嗣曾以聞命率詣熱河行在瞻覲十一月回任次山東壽莊病作遂卒

陳步瀛字麟洲江南江甯人乾隆二十六年會試第一選庶吉士改兵部主事累擢郎中外授河南陳州知府再遷山西按察使尋以山西獄訟繁多改命長麟仍留步瀛蘭州道旋授甘肅按察使薩拉爾回蘇四十三亂既定四十九年鹽茶廳回田五復據石峯堡爲亂總督李侍堯率兵討之以步瀛從捕治諸亂回家屬旋奏令赴安定會甯督餉行次隆德聞副都統明善戰死高廟山步瀛以靜甯隆德平涼諸州縣當下隴要衝靜甯駐兵三百請益兵步瀛調固原兵五百赴平涼隆德守爲犄角復往甯靜收明善餘兵守隘上獎許之尋諭步瀛兵事徑行陳奏不必拘體制步瀛奏臣收明餘善兵尙存九百有奇石峯堡回越隆德犯靜甯平涼知府王立柱督兵民擊之回退據翠屏山靜甯距省五百

餘里中間會甯安定爲糧運要道慮回自靜甯南竄襲我師之後已稟督臣發重兵防護旋疏報靜甯圍解並籌濟南西二路官軍糧餉藥彈稱上旨上命大學士阿桂視師以福康安代侍堯爲總督上諭以軍事諮步瀛擢布政使福康安奏步明瀛白誠實督餉甚力但才具不如浦霖命調安徽布政使事定論功賜孔雀翎江淮大饑民脅衆劫奪步瀛行縣督吏賑卹而捕治其不法者自夏迄秋事漸定步瀛以勞瘁致疾五十四年擢貴州巡撫疾大作卒

孫永清字宏度江南金匱人乾隆三十三年舉人授內閣中書永清未入官嘗佐廣東布政使胡文伯幕土司以爭鬪相訐驗文牒皆明印大吏欲以私造符信罪之永清具稿請文伯力陳得免者二百餘人旋充軍機處章京撰擬精當事至輒倚以辦遷侍讀四十二年雲南總督剛思德奏緬甸將遣使入貢上遣大學士阿桂往莅以永清從緬甸使不至阿桂令永清撰檄諭之送所留守備蘇爾相還四十四年授刑部郎中考選江西道監察御史四十五年超授左副都御史授貴州布政使奏言柞子廠產黑鉛課餘三十餘萬斤請以十萬斤運

廣四十九年署巡撫又奏柞子廠黑鉛例於四川永寧設局收發課餘三百萬斤請歲以五十萬連存永寧五十年擢廣西巡撫劾新寧知州金垣等通稅按察使杜琮鹽道周延俊等並坐奪官五十二年臺灣民林爽文爲亂徵廣西兵永清奏兵出征在例馬兵賞借銀各十兩步兵賞借銀各六兩請於借銀留三兩爲製衣命議叙五十三年篠縣獄繫盜梁美煥謀穴牆逃捕得永清令立誅之奏聞上諭曰獄囚反獄刦獄當立誅若鑽穴越牆祇求苟免不得與此同科今之督撫皆好殺弄權永清失之太過安南阮惠爲亂國王黎維祁出亡其臣阮輝宿護維祁母妻宗族至龍州永清及總督孫士毅疏聞士毅尋發兵討惠永清出駐湖將奏太平設軍需局以福建延建邵道陸有仁桂林知府查淳董其事五十四年維祁復國使迎其母妻宗族永清爲具行李並傳上旨賚錦緞綢布及白金四百諭獎永清自駐南寧彈壓邊關籌辦餵糈措置得宜賜孔雀翎士毅師敗還福康安代爲總督永清與福康安奏安南用兵關內外支放銀百萬米八萬餘逐款詳覈例可用而未用或用不及數者以實用之數具報如

有軍行緊急略有變通與例不符者仍如例覈減上諭令以實爲之秋以廣西秋審冊自綏決改情實凡三案諭責永清寬縱東蘭州安置臺灣降人鄭管陳廷乘舟走追捕以溺水報上命奪知州黃圖等官逮訊永清坐降調命留任是時阮惠更名光平上封爲安南國王請以來年詣京師祝萬壽使阮宏匡等叩關入貢永清令在太平候旨疏聞上令光平使臣於來年燈節前至京師與外藩蒙古等一體入宴責永清拘泥永清旋奏光平使臣自桂林北行上察廣西學政潘曾起不稱職以諮永清永清言曾起性情褊急未愜士心上責永清不先奏劾以方料理安南內附光平將入覲不遽易人罰養廉二年五十五年春光平又以新賜印並御製詩使叩關入貢永清疏以應否令光平使詣京師請旨上諭曰光平遣使陳貢自應令詣京師何必奏請永清又奏太平南甯鎮安三府與安南接壤請屯兵防隘立柵開濠分隸龍憑愬蘇二營管轄報聞四月光平入關以其子光垂臣吳文楚從奏聞上嘉之尋卒弟藩監生以四庫館議叙授中書科中書官至安徽布政使子爾準自有傳

郭世勳漢軍正紅旗人初自筆帖式擢吏部主事選福建龍巖知州五遷湖南布政使乾隆五十四年擢貴州巡撫調廣東上諭曰廣東有洋商鹽務爲腥膻之地世勳操守廉潔治事勤實務慎持素履監臨鄉試奏額送科舉多取數百名經費由督撫捐貲備辦諭國家無此政體不允奏禁大黃山洋西洋各國歲不過五百斤瓊州臺灣亦如之暹羅安南貢船至亦五百斤五十五年總督福康安入覲命世勳署兩廣總督劾雷瑒鎮總兵葉至剛誤民爲匪左江鎮總兵普吉保濫刑斃命皆論罪如律參將錢邦彥巡洋崖州遇盜被戕上以福康安詣京師後世勳不能整飭戡斥之暹羅國王鄭華咨乾隆三十一年被烏圖構兵圍城國君被陷其父昭克復舊基十僅五六舊有丹著氏麻叨塗坯三城仍被佔據請代奏令烏圖割還三城烏圖卽緬甸世勳以其非禮妄干留其使廣東奏聞上命軍機大臣擬檄略謂故緬甸酋贊駁與暹羅詔氏構兵非今國王孟隕事暹羅又係異姓繼立不宜追問詔氏已失疆土天朝撫馭萬國緬甸固新封暹羅亦至華嗣掌國始加封爵宜釋嫌修好共沐寵榮不得以非分干求

妄行瑣瀆命世勳與福康安聯銜照會並告來使但云扎商福康安未經代奏五十六年世勳奏洋船准攬礮內地商船不准携礮上諭之曰商船出洋携礮禦盜不特各國來船未便禁止卽內地商船遇盜不能禦豈有束手待斃之理祇令海口將吏察驗不可因噎廢食上以廣東多械鬪諭世勳稽察化導有步文斌者以罪配德慶州傳習邪教世勳捕得四十餘人送京師上諭以其渠送京師餘令世勳繫獄候刑部擬罪五十七年安南國王阮光平咨言國境嵩陵等七州毗連雲南開化莫氏舊人黃公瓚父子據守資緣內附籲懇代奏詳察使至龍州龍州通判王撫棠以所請非分發書駁還世勳奏聞上嘉撫棠賜大緞獎之光平又以黎維祁弟維祇結土酋農福綰爲亂遣兵勦滅具表獻捷表內並言維祇爲亂因維祁從人丁迓衡等爲維祁通消息請按治維祁罪世勳以光平所言臆度無憑對揚失體照會令將表文刪節繕正奏聞上已先得巡撫陳用敷奏令諭光平具確據並通消息者何人送京師按治命世勳遵前旨照會光平五十八年暹羅安南貢使至世勳遣吏伴送詣京師上以所派職卑

才庸慮爲外藩所輕降旨申飭湖州總兵託爾歡請覲例具清字摺硃批令來見世勳奏委署總兵譯漢文爲俚語上賜荷包愧之英吉利遣使入貢請遣人留京居住上不許慮英吉利貢使還經廣東復多所陳乞時已授長麟兩廣總督命與世勳和衷商榷尋奏英吉利貢使請在黃埔蓋房居住已嚴行拒絕並禁內地奸民指引勾結上賜荷包獎之五十九年入覲途次病作至京師卒賜祭葬

畢沅字纘荀江南鎮洋人乾隆十八年舉人授內閣中書充軍機處章京二十年一甲一名進士授修撰再遷庶子三十一年授甘肅鞏秦階道從總督明山出關勘屯田調安肅道擢陝西按察使上東巡覲行在備言甘肅旱諭治賑並免逋賦四百萬擢布政使屢護巡撫師征金川遣沅督餉軍無匱授巡撫河洛渭並漲朝邑被水治賑全活甚衆募民墾興平蓋屋扶風武功荒地得田八十餘頃濬涇陽龍洞渠溉民田嘉峪關外鎮西迪化士子赴鄉會試者奏請給驛馬置姬氏經五博士奉祀文武成康四王及周公陵墓修華嶽廟暨漢唐以

來名蹟收碑碣儲學宮屢署總督四十一年賜孔雀翎四十四年丁母憂去官四十五年陝西巡撫缺員諭沅在西安久守制將一年命往署理非開在任守制例也四十六年甘肅撤拉爾回蘇四十三爲亂沅會西安將軍伍爾泰提督馬彪發兵討之事平論功賜一品頂帶甘肅冒賑事發御史錢澧劾沅賍降三品頂戴四十八年復還原品尋實授巡撫四十九年甘肅鹽茶廳回田五復亂沅遣兵分道搜勦上命大學士阿桂視師沅治軍需及驛傳供億屢得旨獎勵沅先後撫陝西十年督奏足民之要農田爲上關右大川如涇渭灃澧漓潦潏河洛漆沮汧汭諸水流長源遠若能就近疏引築堰開渠以時蓄洩自無水旱之虞古來雲中北地五原上郡諸處畜牧爲天下饒若酌籌開款市牛羊駝馬爲畀民試牧俟有孳生交還官項餘則畀其人以爲資本耕作與畜牧相兼實爲邊土無窮之利議未行五十年調河南巡撫奏河北諸府患旱各屬倉儲蠲緩賑卹所存無多請留漕糧二十萬備賑旣又請緩徵民欠錢糧並展賑上溫諭嘉之命詣胎簪山求淮水眞源御製淮源記以賜五十一年賜黃馬褂授

湖廣總督伊陽盜秦國棟戕官上責沅捕治未得命仍回巡撫五十三年復授湖廣總督江決荊州發帑百萬治工沅奏江自松滋下至荊州萬城堤折而東北流南逼簪金荆水至無所宣洩請築對岸楊林洲土壩鷄砦石壩逼溜南趨刷洲沙無致壅遏又請修襄陽老龍堤常德石櫃堤潛江仙人堤鑿四川湖北大江險灘便雲南銅運五十九年陝西安康四川大甯邪教並起稱傳自湖北沅赴襄陽鄖陽按治降授山東巡撫上以明年歸政令督撫察民欠錢糧豁免奏蠲山東積逋四百八十七萬常平社倉米穀五十萬四千餘石六十年仍授湖廣總督湖南苗石三保等爲亂命赴荊州常德督餉以運輸周妥賜孔雀翎嘉慶元年枝江民聶人傑等挾邪教爲亂破保康來鳳竹山圍襄陽沅自辰洲至枝江捕治當陽又陷復移駐荊州上命解沅總督旋克當陽獲亂渠張正謨等復命沅爲總督如故予二等輕車都尉世職尋奏亂渠石三保吳牛生吳八月等皆就獲惟石柳鄧未獲請撤各省兵留二三萬分駐苗疆要隘上諭曰撤兵朕所願但平隴未克石柳鄧未獲豈能遽議及此尋獲石柳鄧上命沅馳赴

湖南鎮撫疏言樊城爲漢南一都會請建甄城以工代賑二年請以提督移辰州增設總兵駐花園汛尋報疾作手足不仁賜活絡丸旋卒贈太子太保四年追諭沅教匪初起失察貽誤濫用軍需帑項奪世職籍其家沅以文學起愛才下士職事修舉然不長於治軍又易爲屬吏所蔽功名遂不終

論曰富勒渾秉恬鄂寶輝金川之軍績當臨清之亂圖思德招緬甸之使步瀛禦石峯堡之變嗣曾肅臺灣之政永清受安南之降世勳屢卻暹羅安南干請若英吉利入貢中外交涉於此萌芽川楚教匪沅當其始久而後定諸人者皆身膺疆寄與兵事相表裏功罪不同賞罰或異欲求其事始末固不可略焉故類而錄之